

MESYUARAT KETIGA, PENGGAJAL KELIMA
PARLIMEN KEEMPAT BELAS
2022

HARI RABU : 5 OKTOBER 2022

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 10 HINGGA NO. 48)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN

DARIPADA : PUAN YEO BEE YIN [BAKRI]

TARIKH : 5 OKTOBER 2022 (RABU)

SOALAN

PUAN YEO BEE YIN [BAKRI] minta **MENTERI ALAM SEKITAR DAN AIR** menyatakan bilakah Long Term Low Emission Development Strategies (LT-LEDS) dan sasaran tahun sifar karbon kebangsaan yang jelas akan dimuktamadkan.

JAWAPAN

Tuan Yang Di-Pertua,

1. Untuk makluman Ahli Yang Berhormat, semasa sesi Peringkat Tinggi Persidangan Konvensyen Rangka Kerja Perubahan Iklim Pertubuhan Bangsa-Bangsa Bersatu ke-26 (*United Nations Framework Convention on Climate Change* - UNFCCC COP-26) pada 10 November 2021 lalu, Malaysia telah menyatakan aspirasi pelepasan GHG sifar bersih seawal-awalnya pada tahun 2050. Sasaran tahun sifar bersih karbon negara akan dimuktamadkan tertakluk kepada kajian Strategi Jangka Masa Panjang Pembangunan Rendah Karbon (Long Term Low Emission Development Strategies – LT-LEDS).

2. Strategi LT-LEDS ini akan memberi gambaran dan mengenal pasti dasar serta strategi baru yang perlu dilaksanakan bagi Malaysia mencapai sasaran tersebut, sebelum, pada atau selepas tahun 2050. Strategi dan tindakan mitigasi pelepasan GHG bagi sektor-sektor

SOALAN NO: 10

ekonomi utama negara seperti sektor tenaga, pengangkutan, sisa pepejal, proses industri dan pertanian.

3. LT-LEDS juga turut melibatkan pembangunan unjuran jangka masa panjang bagi pelepasan dan penyerapan GHG sektor-sektor utama tersebut. Ini bagi memberi gambaran indikatif berhubung impak dasar-dasar mitigasi perubahan iklim yang diambil negara pada masa kini termasuk impak terhadap senario pelepasan dan penyerapan GHG pada masa hadapan. Tempoh pelaksanaan bagi LT-LEDS meliputi jangka masa sehingga tahun 2050.

4. Pada awalnya KASA mensasarkan proses LT-LEDS dijangka dapat dimuktamadkan pada penghujung 2022. Walau bagaimanapun, terdapat beberapa kekangan yang perlu ditangani. Namun bagi memastikan sasaran Sifar Bersih (Net Zero) seawal tahun 2050 dapat dicapai, KASA komited dengan melaksanakan pelbagai usaha yang turut melibatkan Kementerian lain seperti:

- (i) Pelaksanaan program di bawah Pelan Pembangunan Mobiliti Rendah Karbon 2021-2030 (*Low Carbon Mobility Blueprint – LCMB*) bagi merealisasikan mobiliti rendah karbon dalam sektor pengangkutan darat. Ini termasuklah pengecualian cukai jalan sehingga 100 peratus kepada kenderaan EV dan pelepasan cukai pendapatan individu sehingga RM2500 bagi kos pembelian dan pemasangan, sewaan dan sewa beli kemudahan serta bayaran yuran langganan kemudahan pengecasan EV; dan
- (ii) Pelaksanaan *Green Electricity Tariff* oleh Kementerian Tenaga dan Sumber Asli (KeTSA).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK LARRY SOON @ LARRY SNG WEI
SHIEN [JULAU]**

TARIKH : 05 OKTOBER 2022 (RABU)

SOALAN

DATUK LARRY SOON @ LARRY SNG WEI SHIEN [JULAU] minta **MENTERI KANAN PENDIDIKAN** menyatakan apakah perancangan Kementerian untuk menaik taraf kuarters kediaman guru di kawasan pedalaman yang sangat uzur di kawasan Julau dan Pakan.

JAWAPAN

Tuan Yang di-Pertua,

Kementerian Pendidikan Malaysia (KPM) mempunyai perancangan yang komprehensif dalam menangani isu berkaitan kuarters termasuk kuarters yang rosak dan uzur di kawasan pedalaman.

Untuk makluman Ahli Yang Berhormat, KPM akan membuat penyelenggaraan kuarters yang memerlukan pembaikan berdasarkan kepada permohonan yang diterima daripada jabatan pendidikan negeri (JPN). Penyelenggaraan kuarters akan dijalankan secara berfasa dan menurut keutamaan berdasarkan jumlah peruntukan yang diterima oleh KPM. Sehingga September 2022, KPM telah membelanjakan sebanyak RM49.2 juta untuk menyelenggara kuarters guru di seluruh negara. Khusus bagi kuarters guru di kawasan Julau dan Pakan, sebanyak RM57 ribu telah diperuntukkan bagi kerja-kerja penyelenggaraan kuarters guru yang telah dikenalpasti.

KPM turut mengenal pasti kuarters yang terletak dalam kawasan sekolah untuk dimasukkan sebagai sebahagian daripada skop pembangunan semula sekolah daif. Khusus untuk Parlimen Julau, terdapat empat projek menaik taraf sekolah daif yang turut melibatkan kuarters guru iaitu di SK Ulu Pedanum, SK Ng Serau, SK Nanga Entaih dan SK Nanga Meluan.

Sekian, terima kasih.

RJM08

**PEMBERITAHUAN PERTANYAAN JAWAB LISAN
DEWAN RAKYAT, MESYUARAT KETIGA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : TUAN KESAVAN A/L SUBRAMANIAM
(SUNGAI SIPUT)**

TARIKH : 5 OKTOBER 2022 (RABU)

SOALAN

TUAN KESAVAN A/L SUBRAMANIAM (SUNGAI SIPUT) minta **MENTERI PEMBANGUNAN WANITA, KELUARGA DAN MASYARAKAT** menyatakan jumlah peserta yang layak mencarum dalam Skim Kasih Suri Keluarga Malaysia dan jumlah peserta yang telah mencarum dalam skim tersebut.

JAWAPAN

Tuan Yang di-Pertua,

Kasih Suri Keluarga Malaysia merupakan insentif Kerajaan untuk suri rumah yang berdaftar di bawah Pangkalan Data Kemiskinan Nasional (eKasih) melalui caruman sukarela bagi tujuan simpanan persaraan untuk kesejahteraan hidup di hari tua.

Bagi program ini, Kerajaan akan menyumbang RM40 sebulan bagi setiap caruman sebanyak RM5 dan ini akan menjadikan jumlah sumbangan Kerajaan sebanyak RM480 setahun. Ia bertujuan untuk menggalakkan suri rumah mencarum secara sukarela di Kumpulan Wang Simpanan Pekerja (KWSP) dan juga sebagai tanda penghargaan Kerajaan kepada sumbangan suri rumah dalam pembangunan negara.

Sehingga 31 Ogos 2022, seramai 446,491 ahli telah mendaftar dalam inisiatif Kasih Suri Keluarga Malaysia. Daripada jumlah tersebut, seramai 296,196 ahli (66.34%) telah membuat caruman.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' MOHD. NIZAR BIN HAJI
ZAKARIA [PARIT]**

TARIKH : 5 OKTOBER 2022 (RABU)

SOALAN :

**Dato' Mohd. Nizar bin Haji Zakaria [Parit] minta MENTERI
PERUSAHAAN PERLADANGAN DAN KOMODITI menyatakan:-**

- (a) usaha Kementerian bagi membantu para pekebun getah dalam menghadapi situasi kejatuhan harga getah pada masa kini; dan
- (b) langkah Kementerian bagi meningkatkan pendapatan para pekebun getah yang berhadapan dengan kos sara hidup kian meningkat.

JAWAPAN

Tuan Yang di-Pertua,

- (a) Kerajaan amat prihatin dengan kebajikan pekebun kecil getah yang mana pendapatan mereka akan terjejas apabila harga getah merosot. Seperti komoditi lain, getah asli adalah berorientasikan eksport dan harganya ditentukan oleh permintaan dan penawaran antarabangsa. Selain itu, faktor-faktor lain yang turut mempengaruhi harga getah asli adalah seperti prestasi pasaran hadapan, harga minyak mentah, kadar pertukaran mata wang asing dan pertumbuhan ekonomi negara-negara pengeluar dan pengimport utama getah dunia. Walau bagaimanapun, usaha dan langkah Kerajaan dalam membantu pengusaha tanaman getah ketika harga pasaran getah jatuh adalah seperti berikut:

(i) Insentif Pengeluaran Getah (IPG)

Di peringkat domestik Kerajaan telah melaksanakan satu mekanisme sokongan harga iaitu Insentif Pengeluaran Getah (IPG) bermula tahun 2015. IPG dilaksanakan bertujuan untuk mengurangkan kesan kejatuhan harga getah kepada pekebun kecil getah di samping menggalakkan mereka untuk terus menoreh sewaktu harga rendah di pasaran di samping memastikan pengeluaran getah domestik yang berterusan.

Melalui IPG, pekebun kecil getah di negara ini akan menerima insentif ke atas setiap kilogram getah yang dikeluarkan apabila purata harga bulanan getah berada di bawah Paras Harga Pengaktifan (PHP) yang ditetapkan iaitu RM2.50 sekilogram getah sekerap. Dalam hal ini, Kerajaan telah membuat pembayaran berjumlah RM441.38 juta kepada 202,533 orang pekebun kecil di seluruh negara bermula daripada 1 September 2015 sehingga 31 Ogos 2022.

(ii) Insentif Pengeluaran Lateks (IPL)

Kerajaan menerusi pembentangan Belanjawan 2022 telah menyediakan peruntukan sebanyak RM25 juta di bawah Program Peningkatan Produktiviti Getah. Ini merangkumi peruntukan bagi pelaksanaan Program Insentif Pengeluaran Lateks (IPL) berjumlah RM 20 juta iaitu sebanyak RM 10 juta secara geran padanan masing-masing dari Kementerian Kewangan Malaysia (MOF) dan Lembaga Getah Malaysia (LGM). Manakala sebanyak RM5 juta untuk perolehan 40 Mesin Mengukur Kandungan Getah Kering (RRIMETER). Peralatan ini yang akan digunakan di bawah Program IPL diberikan secara pinjaman kepada koperasi dan pelesen getah.

Di bawah Program IPL juga, setiap pekebun kecil getah yang menyertai program akan menerima insentif tunai sebanyak RM1.00 bagi setiap kilogram getah kering yang dihasilkan. Sebagai usaha menggalakkan amalan pertanian yang baik (GAP) di sektor kebun kecil seterusnya meningkatkan produktiviti, peserta IPL akan turut menerima bantuan dalam bentuk input pertanian seperti baja dan racun yang berjumlah RM850.00 bagi setiap hektar secara sekali beri (*one-off*).

(iii) RRIMniaga

RRIMniaga adalah inovasi Lembaga Getah Malaysia (LGM) yang merupakan satu aplikasi telefon pintar yang dapat memudahkan urusan niaga getah oleh peniaga getah yang berdaftar dengan LGM. Selain itu, rekod transaksi urusan niaga adalah lebih telus dan ini membantu pemantauan di peringkat LGM. Proses penyaluran bantuan seperti tuntutan IPG dan IPL bagi pemohon yang layak juga adalah lebih mudah kerana dapat dilakukan secara automatik dalam talian. Justeru, penggunaan sistem RRIMniaga secara tidak langsung membantu menjaga kebajikan pekebun kecil getah.

- (b) Langkah-langkah yang dilaksanakan oleh Kementerian bagi meningkatkan pendapatan para pekebun getah adalah seperti berikut:

(i) *My Rubber Online (MyROL)*

Pelaksanaan MyROL merupakan salah satu kaedah pemasaran getah melalui kaedah tender secara atas talian. Kombinasi ciri-ciri di dalam MyROL seperti urus niaga yang telus, tanpa sempadan dan kewujudan pesaing melalui penglibatan lebih ramai pembeli, secara tidak langsung mendorong pencapaian harga tawaran yang lebih kompetitif kepada pekebun kecil. Terkini, terdapat 11 pusat jualan getah di sekitar Kelantan, Perak dan Pahang telah menggunakan MyROL dalam urus niaga mereka dan ini telah memanfaatkan kira-kira 700 pekebun kecil.

(ii) *Projek Transformasi Perusahaan Getah Negara (TARGET)*

Pelaksanaan Projek TARGET melalui konsep koperasi pekebun dan pengusaha ladang getah tempatan bertujuan untuk meningkatkan pendapatan pekebun kecil getah dengan cara memendekkan rantai bekalan melalui penglibatan pekebun dalam rantai industri getah (integrasi menegak). Projek ini dijangka dapat menambah nilai getah dan memberi pulangan dan pendapatan yang lebih baik kepada pekebun kecil iaitu menerusi pemprosesan getah sekerap (cuplump) kepada bentuk getah krip. Ini kerana getah krip yang mempunyai Kandungan Getah Kering (KGK) yang lebih tinggi dapat memberikan harga jualan yang lebih baik berbanding getah sekerap.

Sekian terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : PUAN TEO NIE CHING [KULAI]

TARIKH : 5 OKTOBER 2022 (KHAMIS)

SOALAN

PUAN TEO NIE CHING [KULAI] minta **MENTERI PENGAJIAN TINGGI** menyatakan rancangan untuk mengatasi masalah pelajar B40 dan pelajar berkeperluan yang tidak mendapat kolej kediaman dan tidak mampu untuk menanggung kos sewaan rumah yang tinggi di luar kampus.

JAWAPAN

Tan Sri Yang di-Pertua,

Kementerian Pengajian Tinggi (KPT) sentiasa komited dan peka terhadap keperluan semasa, kebajikan serta kesejahteraan pelajar-pelajar di Institusi Pendidikan Tinggi (IPT), sama ada yang menginap di dalam kampus mahupun pelajar di luar kampus.

Berlandaskan semangat #KPTPrihatin, Kementerian telah melancarkan inisiatif Rumah Siswa pada tahun 2021 yang merangkumi dua (2) elemen, iaitu penubuhan Unit Pengurusan Pelajar Luar Kampus (UPLK) di semua Universiti Awam (UA) dan pembangunan Portal Rumah Sewa Siswa (RSS). Portal RSS ini boleh diakses melalui pautan rumahsiswa.mohe.gov.my dan ia berperanan sebagai platform bagi memudah cara usaha pelajar mencari dan mendapatkan kediaman sama ada rumah atau bilik sewa mampu milik berdekatan dengan kampus.

SOALAN NO.: 14

Penyenaraian premis di dalam Portal ini dilaksanakan oleh pegawai UA sendiri yang bertanggungjawab meneliti, menyaring dan memastikan kediaman yang dikenal pasti adalah kondusif dan bersesuaian dari segi kadar sewaan yang berpatutan, fasiliti yang bersesuaian dan jaminan keselamatan premis. Sehingga 30 September 2022, seramai 31,387 orang pelajar dari seluruh negara telah berdaftar menerusi Portal RSS ini.

KPT juga komited dalam memastikan lebih banyak premis sewaan tersenarai dalam Portal RSS bagi memenuhi keperluan pelajar yang menginap di luar kampus.

Untuk kemudahan kumpulan pelajar berkeperluan yang pulang ke kampus dan tidak mempunyai penginapan di awal pengajian, penginapan transit (sementara) turut disediakan.

Pada masa yang sama, **KPT dengan kerjasama Majlis Perumahan Universiti-universiti Malaysia (MAPUM)** sentiasa dari semasa ke semasa berusaha memastikan ketersediaan penginapan pelajar di dalam kampus dengan mengoptimumkan kapasiti kolej kediaman untuk menampung jumlah pelajar yang semakin meningkat.

Pihak Kementerian percaya melalui pelbagai inisiatif dan usaha yang telah dilaksanakan ini, isu-isu penginapan pelajar dapat ditangani dengan baik.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATUK ABD RAHIM BIN BAKRI [KUDAT]

TARIKH : 05 OKTOBER 2022 (RABU)

SOALAN

DATUK ABD RAHIM BIN BAKRI [KUDAT] minta **MENTERI KANAN PENDIDIKAN** menyatakan status projek bangunan gantian sekolah menumpang SMK Bongkol Pitas yang telah diluluskan pada tahun 2016 dan telah diserahkan kepada Jabatan Kerja Raya (JKR) negeri Sabah. Apakah peruntukan bagi projek ini masih tersedia ataupun telah ditarik balik atau dibatalkan oleh Kementerian.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam menyediakan infrastruktur pendidikan yang selamat dan kondusif untuk kegunaan murid dan warga sekolah di seluruh negara termasuk negeri Sabah.

Untuk makluman Ahli Yang Berhormat, di bawah Rancangan Malaysia ke-11 (RMKe-11) *Rolling Plan* 1 tahun 2016, KPM telah diluluskan projek pembinaan gantian penuh 18 bilik darjah dan lain-lain kemudahan di Sekolah Menengah Kebangsaan Bongkol, Pitas, Sabah dengan kos keseluruhan sebanyak RM56 juta. Peruntukan bagi pelaksanaan projek ini masih tersedia dan Jabatan Kerja Raya (JKR) negeri Sabah merupakan agensi pelaksana. Status semasa pelaksanaan projek ini adalah dalam peringkat prabina iaitu pelantikan perunding. Dalam hal ini, kerja-kerja pembinaan dijangka akan dilaksanakan pada tahun 2023.

Sekian, terima kasih.

RJM06

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN CHARLES ANTHONY SANTIAGO
[KLANG]
TARIKH : 05 OKTOBER 2022 (RABU)

SOALAN

TUAN CHARLES ANTHONY SANTIAGO [KLANG] minta **MENTERI KEWANGAN** menyatakan bagaimana Kementerian merancang untuk membantu rakyat yang telah bersara dan mencegah kemiskinan hari tua memandangkan mereka telah mengeluarkan wang simpanan KWSP semasa pandemik.

JAWAPAN

Tuan Yang di-Pertua,

Dalam usaha membantu ahli membina semula simpanan yang telah dikeluarkan, mekanisme pengisian semula bagi ahli-ahli yang telah membuat pengeluaran melalui program i-Sinar, i-Citra dan Pengeluaran Khas adalah tertakluk kepada terma pengisian semula yang telah ditetapkan bagi setiap program tersebut. Mekanisme yang ditetapkan adalah keseluruhan caruman baharu yang diterima akan dikreditkan ke dalam Akaun 1 sehingga amaun pengeluaran yang dibuat diganti sepenuhnya atau setelah ahli mencapai umur 55 tahun. Langkah ini akan dapat mempercepatkan proses membina semula kecukupan simpanan persaraan ahli selaras dengan objektif utama Akaun 1 iaitu bagi tujuan persaraan.

Selain itu, KWSP menyediakan pelbagai saluran untuk memudahkan ahli mencarum ke dalam KWSP. Bagi ahli yang bekerja dan mempunyai majikan, mereka boleh memilih untuk mencarum melebihi kadar caruman berkanun syer pekerja iaitu 11% pada bila-bila masa. Selain itu, mereka juga boleh mencarum sendiri pada bila-bila masa tertakluk kepada jumlah maksimum RM60,000 setahun.

Bagi ahli yang bekerja sendiri, tiada pendapatan tetap atau di luar tenaga buruh seperti pelajar dan suri rumah yang berumur di bawah 60 tahun turut boleh memilih untuk mencarum secara sukarela pada bila-bila masa mengikut kemampuan di bawah Program i-Saraan sehingga RM60,000 setahun. Sebagai insentif untuk menggalakkan golongan ini menyimpan di bawah i-Saraan, Kerajaan memberikan sumbangan sebanyak 15% daripada amaun caruman, atau sehingga RM250 setahun.

Bagi Ketua Isi Rumah (KIR) atau isteri kepada KIR yang berumur di bawah 55 tahun dan berdaftar di bawah pengkalan data eKasih juga boleh mencarum secara sukarela di bawah Program Kasih Suri Keluarga Malaysia (sebelum ini dikenali sebagai Program i-Suri). Program ini diperkenalkan bagi menggalakkan wanita daripada isi rumah berpendapatan rendah untuk menyimpan demi hari tua mereka.

Di bawah program ini, ahli yang mencarum sekurang-kurangnya RM5 sebulan atau RM60 setahun adalah layak untuk menerima insentif daripada Kerajaan sebanyak RM40 sebulan atau RM480 setahun ke dalam akaun KWSP mereka.

Selain itu, ahli juga boleh menambah simpanan persaraan pasangan (suami/ isteri), ibu bapa atau anak-anak mereka yang merupakan ahli KWSP pada bila-bila masa tertakluk kepada amaun maksimum RM60,000 setahun. Pada masa yang sama, pihak ketiga iaitu individu dan institusi yang diluluskan turut boleh mencarum untuk ahli KWSP juga tertakluk kepada amaun maksimum yang sama iaitu RM60,000 setahun.

Bagi menyediakan kemudahan kepada ahli membuat bayaran Caruman Sukarela, mulai Julai 2022, KWSP telah memperkenalkan fungsi baharu Bayaran Caruman Sukarela melalui aplikasi i-Akaun ahli secara atas talian. Secara keseluruhannya, kemudahan ini telah mendapat sambutan yang menggalakkan di mana setakat 20 September 2022, seramai 89,878 ahli telah memanfaatkan kemudahan ini dengan jumlah jumlah caruman sebanyak RM100.87 juta

KWSP juga menitikberatkan kepentingan ke atas kesedaran dan pengetahuan mengenai perancangan kewangan dan persaraan dalam menyeimbangkan keperluan kewangan untuk hari ini dan kepentingan persaraan di masa hadapan. Oleh itu, KWSP telah memperkenalkan *Retirement Advisory Service* (RAS) sejak 2014 yang bertujuan memberi khidmat nasihat dan rundingan mengenai perancangan kewangan dan persaraan. Perkhidmatan ini diberi secara percuma dan terbuka kepada ahli dan bukan ahli di cawangan-cawangan KWSP di seluruh negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

DARIPADA : DATO' SRI HASAN BIN ARIFIN (ROMPIN)

TARIKH : 5 OKTOBER 2022 (RABU)

SOALAN

DATO' SRI HASAN BIN ARIFIN (ROMPIN) minta **MENTERI PERTANIAN DAN INDUSTRI MAKANAN** menyatakan mengenai penggubalan Lembaga Undang-undang Ruminan Negara. Bilakah akta ini akan dibentangkan di Parlimen.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan telah bersetuju untuk menubuhkan Lembaga Ruminan Negara (LRN) dengan meneliti model yang bersesuaian bagi memastikan penubuhan Lembaga ini berdaya tahan dan mampu mengatasi isu-isu yang dihadapi oleh industri ruminan.

Pasukan Interim Lembaga Ruminan Negara (PILRN) telah diwujudkan bagi meneliti dan memperhalusi penubuhan LRN meliputi merangka hala tuju industri ruminan negara, kaedah pengoperasian LRN, menyelaraskan dan memperkembangkan jaringan industri melalui libat urus, perundingan dan advokasi.

LRN akan memberi tumpuan kepada pembangunan industri ruminan dengan objektif seperti berikut:

- (a) Sebagai agensi peneraju pembangunan industri ruminan negara. LRN akan memperkukuh dan mendayaupaya kerangka institusi, kawal selia dan tadbir urus industri. Intervensi ini juga akan menjadi asas untuk proses penjajaran, rasionalisasi dan penstrukturan semula fungsi dan peranan pelbagai jabatan dan agensi sediaada berkaitan sektor ruminan;
- (b) Meningkatkan populasi asas, produktiviti dan pengeluaran sektor ruminan negara melalui pelaksanaan program pembangunan industri ruminan dengan sokongan peruntukan dana pembangunan secara strategik dan bersasar untuk pengukuhan sekuriti makanan negara serta meningkatkan tahap saradiri (SSL) ruminan negara;
- (c) Meningkatkan pendapatan usahawan dan daya saing pasaran industri ruminan negara melalui pembangunan keusahawanan agribisnes, pengukuhan institusi pemain industri serta

penerokaan peluang dan akses pasaran yang lebih kompetitif; dan

- (d) Meningkatkan pelaburan swasta dan transformasi penternak dengan mempelbagai perkembangan model perniagaan yang berdaya maju dan mampan.

Penubuhan LRN berperanan untuk membangunkan industri ruminan secara holistik, berdaya maju dan mampan. Penubuhan LRN selaras dengan Dasar Agromakanan Negara (DAN) 2.0 iaitu:

- (a) mencapai sasaran tahap SSL 50% bagi daging lembu dan 100% bagi tenusu;
- (b) meningkatkan jumlah bilangan ternakan ruminan; dan
- (c) meningkatkan tahap integrasi ruminan-kelapa sawit.

Penggubalan Rang Undang-Undang (RUU) bagi penubuhan LRN dalam peringkat draf akhir dan dijangka boleh dibentangkan untuk Bacaan Pertama di Parlimen pada sesi bulan Julai tahun 2023.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA, PARLIMEN KEEMPAT
BELAS TAHUN 2022**

PERTANYAAN : LISAN

**DARIPADA : DATUK DR. HASAN BIN BAHROM
(TAMPIN)**

TARIKH : 5 OKTOBER 2022

SOALAN

DATUK DR. HASAN BIN BAHROM (TAMPIN) minta **MENTERI PEMBANGUNAN WANITA, KELUARGA DAN MASYARAKAT** menyatakan secara jelas perancangan yang strategik dan tuntas dalam mendepani era negara sebagai sebuah negara tua, apakah ada perancangan yang lebih konkrit bagi memposisikan kumpulan profesional yang telah berpencen untuk mereka terus menyumbang kepada pembangunan negara.

JAWAPAN

Tuan Yang di-Pertua,

Menjelang tahun 2030, Malaysia akan mencapai status negara tua apabila dijangka sebanyak 15.3% daripada populasi rakyat negara ini akan berumur 60 tahun dan ke atas. Sehubungan dengan itu, Kerajaan telah memformulasikan Dasar dan Pelan Tindakan Warga Emas Negara bagi membuat perancangan dan mengambil langkah sewajarnya menghadapi perkara ini. Tindakan dan usaha bersepadu antara kementerian bagi mempertingkatkan penjagaan, perlindungan dan sokongan bagi membolehkan warga emas menjadi anggota masyarakat yang sihat dan aktif sedang dilaksanakan secara berterusan.

Antara inisiatif yang telah dilaksanakan oleh Kementerian Pembangunan Wanita, Keluarga dan Masyarakat (KPWKM) adalah kajian-kajian holistik yang menjurus kepada persediaan negara ke arah menjadi negara tua merangkumi kesihatan, ekonomi dan sosial.

Kajian semula Dasar dan Pelan Tindakan Warga Emas Negara merupakan komitmen Kerajaan untuk mewujudkan warga emas yang berdikari, bermartabat diri dan dihormati. Kajian pewujudan satu akta khusus bagi warga emas memfokuskan kepada promosi dan perlindungan hak asasi warga emas. KPWKM juga melaksanakan “Kajian Diagnostik bagi Membentuk Model Penjagaan Warga Emas Jangka Masa Panjang yang Bersepadu dan Mampan di Malaysia” dengan objektif mengintegrasikan perkhidmatan yang ditawarkan di peringkat hospital dan institusi dengan di rumah dan komuniti. “Kajian Persediaan Menuju Negara Tua 2030: Bandar Mesra Usia” dilaksanakan untuk menggalakkan penyertaan orang ramai dalam membangunkan rangka kerja dan pelan tindakan untuk mewujudkan persekitaran mesra kanak-kanak, warga emas dan Orang Kurang Upaya (OKU).

Bagi penjawat awam yang telah bersara dan masih ingin meyumbang kepada pembangunan negara, Jabatan Perkhidmatan Awam (JPA) telah mengeluarkan Pekeliling Perkhidmatan Sumber Manusia mengenai Kaedah Pelantikan Pegawai Dalam Perkhidmatan Awam dan Urusan-

Urusan Lain Berkaitan Pelantikan yang berkuatkuasa pada 1 Januari 2022. Pekeliling ini memperuntukkan pesara yang telah bersara atau dibersarakan mengikut undang-undang pencen layak dipertimbangkan untuk dilantik semula secara kontrak bagi jawatan di Kumpulan Pengurusan Tertinggi, Kumpulan Pengurusan dan Profesional atau Kumpulan Sokongan. Pesara boleh dilantik semula secara kontrak bergantung kepada keperluan sesebuah agensi terhadap perkhidmatan yang boleh disumbangkan dan disahkan sihat oleh pengamal perubatan atau pergigian berdaftar.

Berhubungan dengan perancangan bagi memposisikan kumpulan profesional yang telah berpencen untuk mereka terus menyumbang kepada pembangunan negara, ini adalah di bawah bidang tanggungjawab Kementerian Sumber Manusia. Portal MyFutureJobs yang menawarkan peluang pekerjaan telah berjaya menempatkan seramai 245 orang warga emas dalam pelbagai sektor pekerjaan bagi tempoh 1 Januari 2022 sehingga 22 April 2022. Sehingga 31 Mac 2022, Program *Seniors back in Action* (SEBA) yang merupakan salah satu inisiatif di bawah HRDCorp berjaya menempatkan seramai 51 orang warga emas menjana pendapatan melalui penawaran pekerjaan yang lebih produktif bersesuaian dengan keperluan pesara. Inisiatif "*Hiring Seniors*" di bawah TalentCorp dilihat selari dengan aspirasi penuaan aktif melalui pemerkasaan ekonomi warga emas dengan menumpukan kepada kategori M40 dan ke atas (golongan profesional).

Kesimpulannya, dapat dilihat JPA dan Kementerian Sumber Manusia merupakan agensi yang memfokuskan kepada pembangunan dan pengurusan sumber manusia. Pihak JPA telah melaksanakan dasar khusus bagi pesara sektor awam manakala Kementerian Sumber Manusia menyediakan peluang pekerjaan kepada pesara sektor swasta.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI RICHARD RIOT ANAK JAEM
[SERIAN]**

TARIKH : 05 OKTOBER 2022 (RABU)

SOALAN

DATO' SRI RICHARD RIOT ANAK JAEM [SERIAN] minta **MENTERI KANAN PENDIDIKAN** menyatakan apakah usaha Kementerian bagi menangani isu kekurangan guru di Sarawak.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberi perhatian terhadap perkara berkenaan pengisian guru di sekolah rendah dan menengah seluruh negara, termasuk di negeri Sarawak bagi memastikan pengajaran dan pembelajaran di sekolah dapat dilaksanakan dengan berkesan. KPM juga berusaha untuk memastikan guru kelahiran Sarawak diberikan keutamaan untuk ditempatkan di negeri kelahiran mereka berdasarkan kekosongan perjawatan dan keperluan opsyen.

Pelbagai pendekatan telah dan sedang dilaksanakan oleh KPM bagi memastikan semua sekolah di seluruh negara termasuk Sarawak mendapat bekalan guru yang mencukupi. KPM telah selesai melaksanakan pengambilan khas guru secara *one-off* pada tahun 2021. Sehingga 30 September 2022, seramai 16,381 guru telah ditempatkan di sekolah KPM dan daripada jumlah itu, negeri Sarawak telah menerima seramai 3,227 guru *one-off* yang merangkumi 2,621 guru lantikan tetap dan 606 guru lantikan secara *Contract of Service* (CoS).

Sekian, terima kasih.

RJM04

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATUK SERI HAJI SHAMSUL ISKANDAR
@ YUSRE BIN MOHD AKIN
[HANG TUAH JAYA]
TARIKH : 05 OKTOBER 2022 (RABU)

SOALAN

DATUK SERI HAJI SHAMSUL ISKANDAR @ YUSRE BIN MOHD AKIN [HANG TUAH JAYA] minta **MENTERI KEWANGAN** menyatakan pelan induk Kerajaan, garis panduan setiap Kementerian serta perancangan segera Kerajaan untuk menangani krisis nilai mata wang ringgit yang semakin melemah kini dan berada pada paras terendah dalam tempoh 24 tahun jika dibandingkan dengan Dollar Amerika.

JAWAPAN

Tuan Yang di-Pertua,

Kerajaan tidak terlibat dalam menentukan dasar melibatkan kadar pertukaran ringgit kerana ia merupakan bidang kuasa Bank Negara Malaysia (BNM) sebagai pihak berkuasa tunggal yang mengeluarkan mata wang ringgit yang sah diperlakukan di Malaysia dan bertanggungjawab menentukan dasar melibatkan kadar pertukaran ringgit.

Mengenai isu melibatkan nilai mata wang ringgit, perkara yang paling utama yang perlu difahami adalah dunia sedang mengalami persekitaran dolar AS yang mengukuh secara mendadak sehingga mencapai paras yang tertinggi dalam dua dekad ini. Pengukuhan dolar AS ini didorong oleh permintaan yang meningkat susulan kenaikan kadar faedah secara agresif di AS yang merekodkan peningkatan sebanyak 300 mata asas setakat September 2022. Faktor lain yang turut mendorong

pengukuhan dolar AS termasuk para pelabur yang mengambil pendirian berwaspada dan berhati-hati dalam mengendalikan pelaburan mereka berikutan konflik ketenteraan di Ukraine dan pertumbuhan global yang lebih sederhana.

Setakat 29 September 2022, hampir semua mata wang utama dan serantau telah menyusut nilai berbanding dolar AS, termasuk ringgit. Prestasi ringgit yang menurun sebanyak 10.2% secara amnya, sejajar dengan mata wang utama dan serantau yang lain seperti yen Jepun, won Korea, euro, renminbi China, dan mata wang ASEAN lain yang menyusut nilai antara -5.8% kepada -20.3% berbanding dolar AS dalam tempoh yang sama. Meskipun demikian, ringgit telah meningkat berbanding yen Jepun (+12.7%), paun sterling (+12.2%), won Korea (+8.6%), euro (+4.9%), peso Filipina (+3.8%), baht Thailand (+2.6%) dan dolar Australia (+0.8) dalam tempoh yang sama

Tuan Yang di-Pertua,

Berdasarkan perkembangan ini, secara jelas faktor luaran merupakan pendorong utama kepada perkembangan nilai mata wang ringgit. Walaupun nilai ringgit terjejas, namun Malaysia dan kebanyakan negara di mana mata wang mereka terkesan dengan peningkatan dolar AS tidak mengalami sebarang krisis ekonomi atau kewangan. Malah, pertumbuhan ekonomi Malaysia semakin meningkat dan kadar pengangguran telah menurun sejak tempoh pandemik. Walaupun volatiliti dalam pasaran kewangan global dan pertukaran asing meningkat, perkembangan ini dijangka tidak akan menjejaskan pemulihan pertumbuhan ekonomi Malaysia. Keadaan mudah tunai domestik terus mencukupi dengan pasaran kewangan dan pasaran pertukaran asing terus berfungsi dengan teratur.

Kerajaan ingin menegaskan bahawa negara tidak berada dalam krisis nilai mata wang ringgit. Walaupun kadar pertukaran ringgit berbanding dolar AS telah menyusut nilai pada tahun ini, namun ia berbeza daripada keadaan yang berlaku semasa krisis kewangan Asia 1998. Ini kerana tekanan ke atas mata wang kini didorong oleh faktor luaran dan bukan disebabkan kelemahan struktur asas ekonomi

domestik. Sebagai contoh, nisbah pinjaman terjejas bersih untuk sistem perbankan setakat suku kedua 2022 adalah pada 1.1% dan bukannya 18.6% seperti dalam tempoh krisis kewangan Asia.

Tuan Yang di-Pertua,

Sebelum saya menyatakan sekali lagi langkah yang diambil oleh Kerajaan menerusi BNM, saya ingin menekankan bahawa negara kita menghadapi tempoh persekitaran luaran yang tidak menentu. Namun, kedudukan asas ekonomi dan sistem kewangan negara masih teguh dan berdaya tahan. Hakikatnya, kedudukan aset luar Malaysia adalah kukuh, dicerminkan oleh pegangan aset luar oleh institusi kewangan dan syarikat korporat. Selain itu, kadar pertukaran ringgit yang fleksibel akan terus memainkan peranan yang penting sebagai penyerap kejutan luaran tanpa menjejaskan aktiviti ekonomi domestik.

Malaysia juga masih mampu bertahan dari kejutan luar disokong oleh sistem perbankan yang teguh. Kecairan pasaran kewangan Malaysia juga disokong oleh kehadiran pelabur institusi domestik serta pasaran kewangan yang mendalam dan mudah tunai yang tinggi. Perkara ini dapat memudahkan pengantaraan aliran portfolio yang teratur, lantas mengurangkan kesan kejutan kewangan luaran.

Di peringkat Kementerian, Pekeliling Perbendaharaan Malaysia 3.1 telah dikeluarkan pada Julai 2022 dengan memperincikan langkah kawalan perbelanjaan yang antara lain termasuk tidak membenarkan perolehan baharu yang melibatkan bahan import kecuali benar-benar mendesak dan sangat penting. Di samping itu, bagi mengawal aliran keluar, badan berkanun dan syarikat kerajaan hendaklah mengutamakan pelaburan domestik dan kelulusan Kementerian Kewangan diperlukan untuk pelaburan luar negara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK IGNATIUS DARELL LEIKING
[PENAMPANG]**

TARIKH : 05 OKTOBER 2022 (RABU)

SOALAN

DATUK IGNATIUS DARELL LEIKING [PENAMPANG] minta **MENTERI KANAN PENDIDIKAN** menyatakan adakah pindaan Akta Dewan Bahasa dan Pustaka 1959 yang mencadangkan tindakan terhadap pihak yang ingkar kepada penggunaan Bahasa Melayu akan terpakai di wilayah Sabah dan Sarawak.

JAWAPAN

Tuan Yang di-Pertua,

Untuk makluman Ahli Yang Berhormat, cadangan pindaan terhadap Akta Dewan Bahasa dan Pustaka 1959 [*Akta 213*] masih dalam penelitian Kementerian Pendidikan Malaysia (KPM). Sebarang cadangan untuk mewujudkan kesalahan berkenaan dengan penggunaan bahasa Melayu akan diteliti secara mendalam dan menyeluruh termasuk implikasi pelaksanaannya.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN NIK NAZMI BIN NIK AHMAD
[SETIAWANGSA]**

TARIKH : 05 OKTOBER 2022 (RABU)

SOALAN

TUAN NIK NAZMI BIN NIK AHMAD [SETIAWANGSA] minta **MENTERI KANAN PENDIDIKAN** menyatakan tentang langkah yang diambil bagi menarik lebih ramai pelajar-pelajar bukan Bumiputera kembali bersekolah di Sekolah Kebangsaan.

JAWAPAN

Tuan Yang di-Pertua,

Kementerian Pendidikan (KPM) komited untuk memastikan sekolah kebangsaan (SK) menjadi sekolah pilihan utama. KPM sentiasa berusaha untuk memperkasakan SK melalui langkah yang berikut:

- i. menyediakan infrastruktur yang lengkap dan berkualiti;
- ii. mengupayakan pemimpin dan guru yang cekap, kompeten dan berkualiti;
- iii. memastikan semua murid Tahap 1 menguasai kemahiran membaca, menulis dan mengira (3M);
- iv. memastikan kemenjadian murid secara holistik yang merangkumi aspek kognitif, afektif dan psikomotor;
- v. menyediakan sistem sokongan yang kuat dan mencukupi;
- vi. menyediakan iklim dan budaya sekolah yang sihat;
- vii. menawarkan dan melaksanakan kurikulum kebangsaan; dan
- viii. memantapkan pelaksanaan aktiviti kokurikulum dan sukan.

Di samping itu, KPM telah menawarkan mata pelajaran bahasa tambahan di SK, iaitu Bahasa Cina Komunikasi, Bahasa Tamil Komunikasi dan Bahasa Arab Komunikasi bagi menjadikan SK sebagai sekolah pilihan masyarakat. KPM juga mempunyai perancangan memperluaskan penawaran bahasa tambahan ini di lebih banyak SK dalam usaha menjadikan sekolah tersebut sebagai sekolah pilihan.

KPM akan terus memperkasa SK melalui inisiatif yang telah digariskan dalam Pelan Pembangunan Pendidikan Malaysia Tahun 2013-2025.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN CHOW KON YEOW [TANJONG]

TARIKH : 5 OKTOBER 2022 (RABU)

SOALAN

TUAN CHOW KON YEOW [TANJONG] minta **MENTERI ALAM SEKITAR DAN AIR** menyatakan apakah inisiatif Kerajaan dalam mengatasi peningkatan bilangan kenderaan tidak mesra alam (pengangkutan berasaskan bahan api fosil seperti petrol dan gas) yang mencetuskan pelbagai isu alam sekitar antaranya pemanasan global, pencemaran Gas Rumah Hijau (GHG) dan lain-lain. Apa yang dilakukan/perancangan Kerajaan dalam menghadapi krisis iklim bagi tempoh 2018 hingga 2023. Senaraikan juga insentif-insentif yang diberikan/ditawarkan kepada Kerajaan Negeri yang melaksanakan agenda hijau pada tempoh sama.

JAWAPAN

Tuan Yang Dipertua,

1. Kementerian Alam Sekitar dan Air (KASA) di bawah Pelan Pembangunan Mobiliti Rendah Karbon 2021-2030 (*Low Carbon Mobility Blueprint* – LCMB) telah menggariskan fokus dan strategi bagi merealisasikan mobiliti rendah karbon dalam sektor pengangkutan darat menerusi pengurangan pelepasan gas rumah kaca (*greenhouse gas* - GHG) dan penjimatan tenaga menjelang tahun 2030. Pelaksanaan LCMB adalah selaras dengan sasaran oleh Dasar Pengangkutan Negara dan melengkapi Dasar Automotif Nasional (NAP) 2020.
2. Menerusi pelan ini, KASA dengan kerjasama MITI dan MOT merangka strategi dan melaksanakan pelan tindakan peningkatan penggunaan mobiliti elektrik dan penyediaan infrastruktur pengecasan di seluruh negara bagi mengurangkan peningkatan bilangan kenderaan tidak mesra alam.
4. Bagi menggalakkan penggunaan EV, Kerajaan melalui pengumuman Belanjawan 2022 memberikan pengecualian sepenuhnya ke atas duti import, duti eksais dan cukai jualan bagi kenderaan EV bagi kenderaan import (CBU) sehingga 31 Disember 2023, dan kenderaan pemasangan tempatan (CKD) sehingga 31 Disember 2025.
5. Kerajaan juga telah meluluskan pengecualian cukai jalan sehingga 100 peratus kepada kenderaan EV dan pelepasan cukai pendapatan individu sehingga RM2500 bagi kos pembelian dan pemasangan, sewaan dan sewa beli kemudahan serta bayaran yuran langganan kemudahan pengecasan EV. Terkini, Kerajaan juga akan menggunakan EV sebagai kereta tajaan bagi penganjuran Pameran Aeroangkasa dan Maritim Antarabangsa Langkawi atau *Langkawi International Maritime and Aerospace* (LIMA) 2023.
6. Di samping itu, KASA turut mempromosikan mobiliti aktif melalui budaya berbasikal dan berjalan kaki sebagai salah satu aktiviti bagi melahirkan komuniti mobiliti aktif selain mendorong gaya hidup sihat, mengurangkan kesesakan lalu lintas dan mengurangkan penggunaan bahan api.

SOALAN NO: 23

7. Bagi menyokong usaha kerajaan dalam berdepan dengan krisis iklim yang melanda sekarang dan pada masa akan datang, pelbagai dasar dan inisiatif telah dan akan dilaksanakan. Antaranya ialah menyemak semula Dasar Perubahan Iklim Negara (2009), membangunkan Akta Perubahan Iklim Negara, membangunkan Pelan Hala Tuju pelaksanaan *Nationally Determined Contributions* (NDC), membangunkan Strategi Jangka Masa Panjang Pembangunan Rendah Karbon (*Long Term - Low Emission Development Strategies* - LT-LEDS), menubuhkan Pusat Gas Rumah Kaca (GHG) Kebangsaan dan membangunkan Pelan Adaptasi Kebangsaan (*National Adaptation Plan*).
8. Menyedari bahawa peranan kerajaan-kerajaan negeri juga penting dalam menangani perubahan iklim, Kerajaan telah menyediakan insentif-insentif kepada Kerajaan Negeri bagi melaksanakan agenda hijau. Antaranya ialah Geran Pemangkin Bandar Rendah Karbon (GeRAK) dengan peruntukan sebanyak RM35 juta pada tahun 2021 kepada PBT, mewujudkan wakaf masjid hijau melalui Pelaksanaan Program Rumah Ibadat Hijau (RIH), dan mengalakkan penyertaan di dalam Program *International Greentech & Eco Products Exhibition & Conference Malaysia* (IGEM).

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN MARIA CHIN BINTI ABDULLAH
[PETALING JAYA]**

TARIKH : 05 OKTOBER 2022 (RABU)

SOALAN

PUAN MARIA CHIN BINTI ABDULLAH [PETALING JAYA] minta **MENTERI KANAN PENDIDIKAN** menyatakan perbelanjaan 2021 sebenar yang dijalankan untuk membaiki sekolah dan mengapa begitu banyak sekolah tidak mendapat peruntukan membaiki kerosakan fasiliti sekolah sehingga Ahli Parlimen terpaksa menggunakan peruntukan Projek Mesra Rakyat di bawah Jabatan Perdana Menteri.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberi perhatian kepada usaha pembaikan infrastruktur dan fasiliti di sekolah agar dapat berfungsi dengan baik serta memberikan keselamatan dan keselesaan kepada murid dan warga sekolah.

Untuk makluman Ahli Yang Berhormat, KPM telah menyediakan peruntukan bagi tujuan penyelenggaraan untuk sekolah kerajaan (SK) dan sekolah bantuan kerajaan (SBK). Peruntukan untuk tujuan penyelenggaraan akan disalurkan berdasarkan kepada permohonan dan susunan keutamaan mengikut tahap kerosakan yang perlu dibaiki. Bagi SK, peruntukan disalurkan kepada jabatan pendidikan negeri (JPN) dan Jabatan Kerja Raya (JKR) untuk pelaksanaan kerja-kerja penyelenggaraan. Bagi SBK pula, peruntukan disalurkan secara terus ke lembaga pengelola sekolah (LPS) tertakluk kepada permohonan dan garis panduan yang ditetapkan serta keperluan sebenar untuk pembaikan. Bagi tahun 2021, sebanyak RM607.86 juta telah dibelanjakan bagi tujuan penyelenggaraan sekolah merangkumi penyelenggaraan struktur dan bukan struktur bangunan, bumbung, pendawaian elektrik, pagar, longkang, padang dan lain-lain penyelenggaraan kecil.

Sekian, terima kasih.

RJM05

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SIM CHEE KEONG
[BUKIT MERTA JAM]**

TARIKH : 5 OKTOBER 2022 (RABU)

SOALAN

TUAN SIM CHEE KEONG [BUKIT MERTA JAM] minta **MENTERI BELIA DAN SUKAN** menyatakan jumlah peruntukan kepada setiap persatuan sukan kebangsaan pada dari tahun 2017 sehingga kini.

JAWAPAN

Tan Sri Yang di-Pertua,

Untuk makluman Ahli Yang Berhormat, Kementerian Belia dan Sukan (KBS) menyediakan dana bantuan di bawah Peruntukan Mengurus dan Peruntukan Kumpulan Wang Amanah Sukan Negara (KWASN) kepada persatuan sukan yang berdaftar secara sah untuk melaksanakan program atau aktiviti sukan. Persatuan-persatuan sukan boleh mengemukakan permohonan kewangan bagi melaksanakan aktiviti sukan kepada Kementerian ini untuk dipertimbangkan.

Dari tahun 2017 sehingga kini, sebanyak RM11.7 juta telah diluluskan dan disalurkan kepada persatuan sukan kebangsaan melalui Peruntukan KWASN, dan sebanyak RM8.5 juta telah diluluskan melalui Peruntukan Mengurus. Ini menjadikan jumlah keseluruhan yang telah diluluskan melalui kedua-dua peruntukan tersebut dari tahun 2017 sehingga kini adalah sebanyak RM20.2 juta.

SOALAN NO : 25

Selain itu, Kementerian ini menerusi Majlis Sukan Negara (MSN) sentiasa membantu Persatuan Sukan Kebangsaan yang terlibat dalam pembangunan dan kemajuan sukan prestasi tinggi negara. Peruntukan yang diberikan bukan sahaja meliputi bantuan perbelanjaan program latihan serta penyertaan atlet senior dan pelapis, tetapi juga meliputi perbelanjaan pembangunan atlet remaja di peringkat negeri yang disalurkan melalui Majlis Sukan Negeri.

Jumlah keseluruhan peruntukan yang diberikan kepada Persatuan Sukan kebangsaan bagi pembangunan Sukan Prestasi Tinggi di bawah Program MSN dari tahun 2017 hingga September 2022 adalah sebanyak RM219.8 juta.

Perincian jumlah peruntukan yang disalurkan kepada Persatuan Sukan kebangsaan mengikut tahun pula adalah seperti berikut :

- (a) Tahun 2017 : RM45.6 juta
- (b) Tahun 2018 : RM28 juta
- (c) Tahun 2019 : RM56.3 juta
- (d) Tahun 2020 : RM47.4 juta
- (e) Tahun 2021 : RM42.5 juta

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATUK SERI PANGLIMA HAJI MOHD
SHAFIE BIN HAJI APDAL [SEMPORNA]
TARIKH : 05 OKTOBER 2022 (RABU)

SOALAN

DATUK SERI PANGLIMA HAJI MOHD SHAFIE BIN HAJI APDAL
[SEMPORNA] minta **MENTERI KEWANGAN** menyatakan :-

- (a)sejauh manakah tindakan Kerajaan meningkatkan Kadar Dasar Semalaman (OPR) mempengaruhi situasi inflasi berbanding kaedah pemberian subsidi (nyatakan dalam peratusan); dan
- (b)apakah kesan kepada ekonomi secara praktikal sekiranya kita tidak meningkatkan OPR pada masa ini dan nyatakan alternatif lain yang boleh dilaksanakan oleh MOF selain daripada kaedah ini.

JAWAPAN

Tuan Yang di-Pertua,

Kerajaan tidak campur tangan dalam keputusan mengenai pelaksanaan dasar monetari kerana ia ditentukan oleh Jawatankuasa Dasar Monetari (MPC) yang terdiri daripada ahli-ahli industri dan cendekiawan negara oleh Bank Negara Malaysia (BNM) berdasarkan autonomi yang diperuntukkan kepada MPC BNM di bawah Akta Bank Negara Malaysia 2009 (CBA 2009).

Semasa krisis COVID-19, Kadar Dasar Semalaman atau OPR telah diturunkan kepada 1.75 peratus pada 2020, iaitu paras yang terendah dalam sejarah. Tindakan ini adalah bagi mengurangkan kesan pandemik semasa ekonomi Malaysia sedang mengalami kemelesetan. Kini, negara tidak lagi mengalami krisis dan ekonomi Malaysia terus menunjukkan momentum pertumbuhan yang kukuh dengan KDNK pada suku kedua 2022 mencatat pertumbuhan sebanyak 8.9 peratus daripada 5 peratus yang dicatatkan pada suku pertama tahun ini. Berikutan prospek pertumbuhan ekonomi Malaysia yang positif, MPC mula membuat pelarasan pada OPR secara beransur-ansur selari dengan aktiviti ekonomi yang bertambah baik.

Tuan Yang di-Pertua,

Sejajar dengan pemulihan kegiatan ekonomi, peningkatan kadar inflasi bukan sahaja didorong oleh faktor tolakan kos (*cost-push*), malah telah juga menunjukkan tanda-tanda wujudnya faktor kenaikan inflasi tarikan permintaan (*demand pull inflation*). Jika MPC tidak mula melaraskan OPR secara terkawal dan beransur-ansur, OPR yang terlalu rendah boleh mengakibatkan aktiviti perbelanjaan dan peminjaman yang berlebihan, lantas berpotensi menyebabkan kenaikan harga dengan drastik, sebagaimana yang sedang berlaku di kebanyakan negara maju.

Di kebanyakan negara, tahap inflasi yang semakin serius boleh dikawal melalui tindakan dasar monetari yang bersesuaian. Kenaikan OPR yang diputuskan oleh MPC bertujuan untuk mengelakkan keadaan

harga terus meningkat secara lebih mendadak dan meluas kepada pelbagai barangan. Jika inflasi menjadi tidak terkawal, kuasa beli (*purchasing power*) isi rumah akan terjejas, terutamanya bagi golongan berpendapatan rendah. Bagi penabung dan pesara pula, inflasi yang tinggi juga menjejaskan simpanan mereka kerana kenaikan harga yang mendadak akan mengurangkan kuasa beli simpanan mereka dengan drastik.

MPC berpandangan impak kewangan ke atas individu daripada kenaikan OPR secara terkawal dan beransur-ansur adalah jauh lebih baik daripada impak kewangan dari segi kejatuhan kuasa beli akibat kadar inflasi yang tinggi dan tidak terkawal. Sejak awal tahun sehingga Ogos 2022, inflasi keseluruhan mencatat purata sebanyak 3.1 peratus berbanding 2.5 peratus sepanjang 2021. Berdasarkan faktor-faktor ini dan mengambil iktibar dari pengalaman negara lain, MPC mengambil keputusan untuk melaraskan kadar OPR melalui kenaikan 25 mata asas secara beransur-ansur mulai bulan Mei, Julai dan September 2022, sehingga mencapai kadar OPR terkini iaitu 2.50 peratus.

Pendekatan kenaikan OPR secara beransur-ansur ini adalah sangat penting bagi mengelakkan keperluan untuk menaikkan OPR dengan lebih tinggi dan lebih mendadak pada masa akan datang seperti apa yang sedang berlaku di Amerika Syarikat (kadar inflasi: 8.3%; kenaikan kadar dasar pada tahun 2022: +300 mata asas) dan di United Kingdom (kadar inflasi: 9.9%; kenaikan kadar dasar: +200 mata asas). Dalam keadaan terdesak, terutamanya jika inflasi masih tidak dapat dibendung biarpun kadar faedah dinaikkan dengan lebih tinggi dan lebih mendadak, negara mungkin terpaksa mengalami kemelesetan ekonomi untuk mengawal inflasi seperti di United Kingdom dan Amerika Syarikat.

Tuan Yang di-Pertua,

Pada paras OPR terkini, dasar monetari kekal akomodatif dan menyokong pertumbuhan ekonomi negara dan pada masa yang sama memastikan kestabilan harga.

Secara umum, saya ingin menekankan bahawa program bantuan dan bantuan bayaran balik pinjaman secara bersasar serta program khidmat nasihat masih tersedia untuk meneghadkan impak kenaikan OPR terhadap golongan peminjam mudah terjejas. Perlu ditekankan bahawa dasar makroekonomi seperti dasar monetari perlu diselaraskan agar inflasi kekal terkawal dan tidak menjadi bertambah buruk yang memerlukan langkah yang lebih agresif.

Kementerian Kewangan akan terus memantau faktor-faktor luaran yang boleh memberi impak negatif kepada situasi ekonomi domestik bagi memastikan kos sara hidup rakyat terkawal, Kerajaan juga sentiasa memantau situasi semasa dan yakinlah bahawa dasar Kerajaan, baik dari segi bantuan langsung mahupun yang tidak langsung seperti subsidi keperluan asas, adalah bertujuan memastikan kebajikan rakyat sentiasa terbela.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DR. MASZLEE BIN MALIK
[SIMPANG RENGAM]**

TARIKH : 05 OKTOBER 2022 (RABU)

SOALAN

DR. MASZLEE BIN MALIK [SIMPANG RENGAM] minta **MENTERI KANAN PENDIDIKAN** menyatakan apakah KPM akan melaksanakan Program Sarapan Pagi percuma seperti yang pernah direncanakan pada tahun 2019.

JAWAPAN

Tuan Yang di-Pertua,

Untuk makluman Ahli Yang Berhormat, Mesyuarat Jemaah Menteri pada 15 Januari 2020 telah memutuskan untuk tidak meneruskan Program Sarapan Pagi (PSP) dan program rancangan makanan sedia ada untuk murid sekolah rendah, iaitu Program Rancangan Makanan Tambahan (RMT) diteruskan dengan penambahbaikan.

KPM telah menambah baik pelaksanaan program RMT dengan pemberian susu pada setiap hari berbanding dua kali seminggu sebelum ini. Melalui pelaksanaan ini, murid dibekalkan dengan keperluan nutrien lengkap yang diperlukan bagi membantu pertumbuhan yang sihat sebagaimana yang dicadangkan oleh Kementerian Kesihatan Malaysia.

KPM yakin pelaksanaan RMT memberi kesan baik kepada murid sekolah rendah khususnya dari luar bandar dan golongan berpendapatan rendah bagi memperbaiki keadaan kesihatan, fizikal dan amalan pemakanan yang sihat.

Sekian, terima kasih.

RJM09

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN YUSUF BIN ABD. WAHAB
(TANJONG MANIS)**

TARIKH : 5 OKTOBER 2022

SOALAN

TUAN YUSUF BIN ABD. WAHAB (TANJONG MANIS) minta **MENTERI PERTANIAN DAN INDUSTRI MAKANAN** menyatakan adakah peruntukan untuk kerja-kerja membaiki dan menaik taraf ban pertanian dan pintu air untuk melindungi tanah sawah dan pertanian di Kampung Paloh, Penipah, Tekajong dan Bruit di Parlimen Tanjong Manis. Masalah ban pertanian ini telah merosakkan banyak hasil tanaman penduduk di kawasan tersebut.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) melalui Bahagian Pengairan dan Saliran Pertanian dan Jabatan Pengairan dan Saliran (JPS) Negeri Sarawak telah mengemukakan permohonan butiran projek baharu di bawah *Rolling Plan* ke-3 tahun 2023, RMKe-12 kepada Unit Perancangan Ekonomi (EPU), di mana permohonan ini menjurus kepada skop membaikpulih dan menaiktaraf infrastruktur sediaada, yang merangkumi baikpulih pelbagai komponen/struktur sedia ada serta pembinaan komponen/struktur baru termasuk ban dan pintu kawalan air di kawasan Pulau Buit, termasuklah Kampung Buit, Kampung Tekajong dan Kampung Penipah.

Pihak MAFI juga akan mengemukakan permohonan butiran projek baharu di bawah *Rolling Plan* ke-4 tahun 2024, RMKe-12 bagi kerja-kerja baikpulih infrastruktur pengairan dan saliran pertanian di kawasan yang terlibat di Kampung Paloh.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN SIVAKUMAR VARATHARAJU NAIDU
[BATU GAJAH]**

TARIKH : 05 OKTOBER 2022 (RABU)

SOALAN

TUAN SIVAKUMAR VARATHARAJU NAIDU [BATU GAJAH] minta **MENTERI KANAN PENDIDIKAN** menyatakan secara terperinci mengenai jumlah wang penyelenggaraan bagi tahun 2021 dan 2022 yang telahpun disalurkan kepada SJKC dan SJKT setakat hari ini. Berapa jumlah peruntukan penyelenggaraan dalam Belanjawan 2021 yang tidak disalurkan dan Belanjawan 2022 yang belum digunakan setakat ini bagi penyelenggaraan SJKC dan SJKT. Mengapa.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberi perhatian kepada usaha menyelenggara dan menyediakan bangunan dan fasiliti pendidikan agar dapat berfungsi dengan baik, selamat dan kondusif digunakan oleh murid dan warga sekolah.

Untuk makluman Ahli Yang Berhormat, KPM telah menyediakan peruntukan bagi tujuan penyelenggaraan untuk sekolah kerajaan (SK) dan sekolah bantuan kerajaan (SBK). Peruntukan untuk tujuan penyelenggaraan akan disalurkan berdasarkan kepada permohonan dan susunan keutamaan mengikut tahap kerosakan yang perlu dibaiki. Bagi SK, peruntukan disalurkan kepada jabatan pendidikan negeri (JPN) dan Jabatan Kerja Raya (JKR) untuk pelaksanaan kerja-kerja penyelenggaraan. Bagi SBK pula, peruntukan disalurkan secara terus ke lembaga pengelola sekolah (LPS) tertakluk kepada permohonan dan garis panduan yang ditetapkan serta keperluan sebenar untuk pembaikan.

Bagi tahun 2021, KPM telah menyalurkan peruntukan sebanyak RM60.03 juta bagi menyelenggara sekolah jenis kebangsaan Cina (SJKC) dan RM21.93 juta bagi penyelenggaraan sekolah jenis kebangsaan Tamil (SJKT) yang merangkumi penyelenggaraan struktur dan bukan struktur bangunan, bumbung, pendawaian elektrik, pagar, longkang, padang dan lain-lain penyelenggaraan kecil.

Bagi tahun 2022, sehingga September 2022, KPM telah menyalurkan peruntukan sebanyak RM22.4 juta bagi menyelenggara SJKC dan RM7.53 juta bagi penyelenggaraan SJKT. Peruntukan bagi tahun 2022 akan selesai disalurkan selewat-lewatnya sehingga bulan November 2022 memandangkan masih terdapat permohonan yang sedang diproses, semakan pihak teknikal bagi menentukan keperluan sebenar dan kerja-kerja penyelenggaraan yang masih dilaksanakan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : TUAN CHAN MING KAI [ALOR SETAR]

TARIKH : 5 OKTOBER 2022 (RABU)

SOALAN

TUAN CHAN MING KAI [ALOR SETAR] minta **MENTERI PENGAJIAN TINGGI** menyatakan berkenaan kes pelajar Muhammad Omar Mokhtar Abdul Rahman:

- (a) apakah dokumen identiti yang melayakkan seorang *stateless* ditawarkan peluang pelajaran di IPTA; dan
- (b) kos pengajian IPTA bagi pelajar *stateless* dikategorikan sebagai pelajar tempatan atau pelajar antarabangsa.

JAWAPAN

Tan Sri Yang di-Pertua,

Kementerian Pengajian Tinggi (KPT) sentiasa komited dalam memastikan para pelajar di Malaysia berpeluang melanjutkan pengajian ke peringkat yang lebih tinggi. Berhubung dengan kes **saudara Muhammad Omar Mokhtar Abdul Rahman**, KPT mengambil maklum bahawa Kementerian Dalam Negeri (KDN) telah **meluluskan permohonan kewarganegaraan** beliau **melalui surat bertarikh 12 September 2022**.

Untuk makluman Ahli Dewan juga, saudara Muhammad Omar merupakan **calon Lulusan STPM/ Setaraf** yang telah **berjaya ditawarkan ke Program Sarjana Muda Pengurusan Sumber Manusia Dengan Kepujian di Universiti Utara Malaysia (UUM) untuk Sesi Akademik 2022/2023**.

- (a) Bagi seorang *stateless* yang ingin melanjutkan pengajian ke IPT, mereka perlulah menyediakan dokumen pengenalan diri yang mana permohonan kemasukan ke IPT akan **diproses tertakluk kepada syarat-syarat kemasukan kategori bukan warganegara**.
- (b) Bagi maksud kos yuran pengajian IPTA bagi **pelajar bukan warganegara** pula, kadar yuran yang dikenakan adalah sama dengan kadar yuran pelajar antarabangsa dan tertakluk kepada universiti awam (UA) yang dimohon.

Kementerian secara umumnya akan terus memastikan peluang akses ke pendidikan tinggi kepada calon yang layak adalah tanpa mengira kaum, agama, bangsa dan latar belakang.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN HANNAH YEOH TSEOW SUAN
[SEGAMBUT]**

TARIKH : 05 OKTOBER 2022 (RABU)

SOALAN

PUAN HANNAH YEOH TSEOW SUAN [SEGAMBUT] minta **MENTERI KANAN PENDIDIKAN** menyatakan sebab Ahli Parlimen Pembangkang tidak dibenarkan masuk ke kawasan sekolah bagi memastikan peruntukan yang disalurkan oleh Kerajaan Persekutuan kepada Ahli Parlimen Pembangkang untuk kerja menaik taraf atau pembinaan infrastruktur disiapkan mengikut permohonan peruntukan yang ditetapkan.

JAWAPAN

Tuan Yang di-Pertua,

Kementerian Pendidikan Malaysia (KPM) mempunyai prosedur standard bagi kehadiran orang kenamaan atau individu tertentu ke sekolah dan penggunaan premis atau kemudahan sekolah oleh pihak luar.

Untuk makluman Ahli Yang Berhormat, KPM telah mengeluarkan Surat Pekeliling Ikhtisas Bil.3/2008: Mengundang Orang-orang Kenamaan ke Upacara Sekolah dan Penggunaan Premis Sekolah oleh Pihak Luar bertarikh 31 Mac 2008. Berdasarkan surat pekeliling ini, semua urusan pihak luar termasuk orang kenamaan untuk memasuki sekolah perlu mendapat kebenaran daripada KPM melalui Pengarah Pendidikan Negeri. Perkara ini juga telah diperingatkan melalui satu surat peringatan yang bertarikh 11 November 2019. Surat pekeliling ini boleh dimuat turun melalui laman sesawang rasmi KPM melalui pautan www.moe.gov.my.

Sekian, terima kasih.

RJM11

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KEEMPAT BELAS 2022**

**PERTANYAAN : LISAN
DARIPADA : DATO' ABDULLAH SANI BIN ABDUL
HAMID [KAPAR]
TARIKH : 05 OKTOBER 2022 (RABU)**

SOALAN

DATO' ABDULLAH SANI BIN ABDUL HAMID [KAPAR] minta **MENTERI KEWANGAN** menyatakan apakah rasional menaikkan Kenaikan Kadar Dasar Semalaman (OPR) sebanyak tiga kali pada tahun ini sehingga membebankan rakyat.

JAWAPAN

Tuan Yang di-Pertua,

Akta Bank Negara Malaysia 2009 (CBA 2009) telah memperuntukkan tanggungjawab kepada Jawatankuasa Dasar Monetari (Monetary Policy Committee, MPC) Bank Negara Malaysia (BNM) untuk merumuskan dasar monetari secara autonomi bagi mengekalkan kestabilan harga serta memastikan pertumbuhan ekonomi kekal mampan pada masa hadapan.

Semasa krisis COVID-19, Kadar Dasar Semalaman atau OPR telah diturunkan daripada 3.00 peratus kepada 1.75 peratus pada tahun 2020, iaitu paras yang terendah dalam sejarah. Tindakan ini diambil untuk mengurangkan kesan pandemik semasa ekonomi Malaysia sedang mengalami kemelesetan. Kini, ekonomi negara tidak lagi mengalami krisis bahkan terus berkembang dan mencatat pertumbuhan yang kukuh pada suku pertama 2022 sebanyak 5 peratus dan suku kedua 8.9 peratus. Kegiatan ekonomi telah kembali pulih apabila negara beralih kepada fasa endemik dengan sempadan antarabangsa dibuka semula. Berikutan prospek pertumbuhan ekonomi Malaysia yang positif, MPC mula membuat pelarasan pada OPR secara beransur-ansur selari dengan aktiviti ekonomi yang bertambah baik.

Dari segi beban kepada rakyat, satu pertiga pinjaman yang membabitkan golongan B40 adalah pada kadar tetap, dengan itu mereka tidak terjejas. Tambahan pula, sebahagian besar yang meminjam secara kadar terapung telah mengambil pinjaman tersebut sebelum krisis COVID-19 iaitu pada masa itu, OPR sekurang-kurangnya 3 peratus, lebih tinggi daripada kadar semasa. Perlu juga diambil kira bahawa jika kadar OPR kekal rendah, ianya bakal menjejaskan mereka seperti pesara yang bergantung kepada pendapatan faedah daripada simpanannya.

Tuan Yang di-Pertua,

Sejajar dengan pemulihan kegiatan ekonomi, peningkatan kadar inflasi bukan sahaja didorong oleh faktor tolakan kos (cost-push), malah

telah juga menunjukkan tanda-tanda wujudnya faktor kenaikan inflasi disebabkan tarikan permintaan (demand pull inflation). Jika BNM tidak mula melaraskan OPR secara terkawal dan beransur-ansur, OPR yang terlalu rendah boleh menyumbang kepada aktiviti perbelanjaan dan peminjaman yang tinggi, lantas berpotensi menyebabkan kenaikan harga mendadak, sebagaimana yang sedang berlaku di kebanyakan negara maju.

Di kebanyakan negara, tahap inflasi yang semakin serius boleh dikawal melalui tindakan dasar monetari yang bersesuaian. Jika inflasi menjadi tidak terkawal, kuasa beli (purchasing power) isi rumah akan terjejas, terutamanya bagi golongan berpendapatan rendah. Bagi penabung dan pesara pula, inflasi yang tinggi juga menjejaskan simpanan mereka kerana kenaikan harga yang mendadak akan mengurangkan kuasa beli simpanan mereka dengan drastik. Oleh yang demikian, impak kewangan ke atas individu daripada kenaikan OPR secara terkawal dan beransur-ansur adalah jauh lebih baik daripada impak kewangan dari segi kejatuhan kuasa beli akibat kadar inflasi yang tinggi dan tidak terkawal. Sejak Januari sehingga Ogos 2022, inflasi keseluruhan berpurata pada 3.1 peratus berbanding 2.5 peratus sepanjang 2021.

Tuan Yang di-Pertua,

Berdasarkan faktor-faktor ini dan mengambil iktibar dari pengalaman negara lain, BNM melalui MPC mengambil keputusan untuk melaraskan kadar OPR secara beransur-ansur menerusi kenaikan 25 mata asas pada bulan Mei, Julai dan September 2022, sehingga mencapai kadar OPR terkini iaitu 2.50 peratus. Pendekatan kenaikan OPR secara beransur-ansur ini sangat penting bagi mengelakkan keperluan untuk menaikkan OPR dengan lebih tinggi dan lebih mendadak pada masa akan datang seperti yang sedang dialami oleh Amerika Syarikat (kadar inflasi: 8.3%; kenaikan kadar dasar pada tahun 2022: +300 mata asas), di United Kingdom (kadar inflasi: 9.9%; kenaikan kadar dasar: +200 mata asas), dan di Filipina (kadar inflasi: 6.3%; kenaikan kadar dasar: +225 mata asas). Dalam keadaan terdesak, sekiranya inflasi tidak dapat dibendung biarpun kadar faedah dinaikkan dengan lebih tinggi dan lebih mendadak, negara mungkin terpaksa mengalami kemelesetan

ekonomi untuk mengawal inflasi seperti di United Kingdom dan Amerika Syarikat.

Pada paras OPR terkini, dasar monetari kekal akomodatif dan menyokong pertumbuhan ekonomi negara dan pada masa yang sama memastikan kestabilan harga.

Secara umum, saya ingin menekankan bahawa program bantuan dan bantuan bayaran balik pinjaman secara bersasar serta program khidmat nasihat masih tersedia untuk mengehadkan impak kenaikan OPR terhadap golongan peminjam mudah terjejas. Perlu ditekankan bahawa dasar makroekonomi seperti dasar monetari perlu diselaraskan agar inflasi kekal terkawal dan tidak menjadi bertambah buruk yang memerlukan langkah yang lebih agresif.

Kementerian Kewangan akan terus memantau faktor-faktor luaran yang boleh memberi impak negatif kepada situasi ekonomi domestik bagi memastikan kos sara hidup rakyat terkawal, Kerajaan juga sentiasa memantau situasi semasa dan yakinlah bahawa dasar Kerajaan, baik dari segi bantuan langsung mahupun yang tidak langsung seperti subsidi keperluan asas, adalah bertujuan memastikan kebajikan rakyat sentiasa terbela.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN CHAN FOONG HIN
[KOTA KINABALU]
TARIKH : 05 OKTOBER 2022 (RABU)

SOALAN

TUAN CHAN FOONG HIN [KOTA KINABALU] minta **MENTERI KEWANGAN** menyatakan formula yang digunakan bagi menentukan jumlah bayaran dalam Perintah Perlembagaan Persekutuan (Kajian Semula Pemberian Khas di bawah Perkara 112D) (Negeri Sabah) 2022. Berapa hasil dijana dari Sabah kepada Kerajaan Persekutuan seperti bayaran cukai langsung dan tidak langsung.

JAWAPAN

Tuan Yang di-Pertua,

Untuk makluman Ahli Yang Berhormat dan Dewan Yang Mulia ini,

Perkara yang dibangkitkan oleh Yang Berhormat telah difailkan ke mahkamah oleh 12 orang wakil rakyat dan Persatuan Undang-Undang Sabah (*Sabah Law Society*) terhadap Kerajaan Persekutuan dan Kerajaan Negeri Sabah.

Oleh yang demikian, tiada apa-apa ulasan atau jawapan boleh diberikan atas dasar *sub judice*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN KARUPAIYA A/L MUTUSAMI
[PADANG SERAI]
TARIKH : 05 OKTOBER 2022 (RABU)

SOALAN

TUAN KARUPAIYA A/L MUTUSAMI [PADANG SERAI] minta **MENTERI KEWANGAN** menyatakan Tabung Harapan adakah Kerajaan masih mengutip dana untuk Tabung tersebut dan dana sedia ada digunakan untuk tujuan apa.

JAWAPAN

Tuan Yang di-Pertua,

Untuk makluman ahli Yang Berhormat, akaun Tabung Harapan Malaysia (THM) telah ditadbir oleh Jawatankuasa Akaun bagi menentukan penggunaan dana dalam akaun amanah tersebut mengikut tatacara yang termaktub di dalam arahan amanahnya iaitu akan digunakan untuk pembayaran hutang Kerajaan Persekutuan dan pembayaran balik yang perlu dilakukan bagi tujuan akaun amanah ini sahaja. Akaun THM telah **ditutup berkuatkuasa 3 Jun 2020**. Tarikh akhir penerimaan sumbangan ke dalam akaun THM adalah pada 14 Januari 2019. **Dana dan faedah yang diperoleh akaun ini telah digunakan untuk melunaskan sebahagian hutang 1MDB.**

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : PUAN NOORITA BINTI SUAL
(TENOM)**

TARIKH : 5 OKTOBER 2022 (RABU)

SOALAN

PUAN NOORITA BINTI SUAL (TENOM) minta **MENTERI PERTANIAN DAN INDUSTRI MAKANAN** menyatakan langkah-langkah yang diambil untuk membantu petani-petani kecil khasnya di kawasan luar bandar dalam usaha Kementerian mengurangkan kadar inflasi makanan dan mengurangkan kebergantungan negara kepada import makanan.

JAWAPAN

Tuan Yang di-Pertua,

Untuk makluman Ahli Yang Berhormat, dalam usaha mengurangkan kesan kadar inflasi makanan dan kebergantungan negara kepada import makanan, Kementerian Pertanian dan Industri Makanan (MAFI) telah melaksanakan pelbagai usaha kepada golongan sasaran termasuk para petani kecil di kawasan luar bandar.

Antara usaha kerajaan adalah dengan memberikan insentif bagi meringankan bebanan dalam menghadapi tekanan ekonomi disebabkan oleh peningkatan kos sara hidup seperti berikut:

- (i) pemberian insentif kepada pesawah sementara menunggu hasil tuaian sebanyak RM1,200 iaitu RM200 sebulan selama 3 bulan semusim dalam tempoh dua (2) musim penanaman padi berturut-turut; dan
- (ii) pemberian subsidi dan insentif nelayan yang merangkumi elaun sara hidup nelayan laut pada kadar RM300 sebulan dan elaun sara hidup nelayan darat sebanyak RM250 sebulan. Di samping itu, nelayan juga diberikan insentif hasil tangkapan sebanyak RM0.10 per kilogram mengikut syarat yang ditetapkan.

Bagi memastikan para petani berupaya untuk terus meningkatkan pengeluaran dan mengurangkan kebergantungan terhadap import makanan, Kerajaan juga telah melaksanakan program seperti berikut:

- (i) pelaksanaan Program Rezeki Tani bertujuan untuk membantu meningkatkan pendapatan peserta melalui projek-projek ekonomi berkaitan pertanian, penternakan dan perikanan selain daripada memperluaskan pengetahuan, kemahiran serta daya saing peserta melalui latihan-latihan yang disediakan di bawah program. Kumpulan sasaran terdiri daripada golongan miskin dan isi rumah berpendapatan sehingga 20% daripada Paras Garis Kemiskinan (PGK) semasa (pendapatan peserta tidak melebihi RM2,650);

- (ii) pelaksanaan Skim Rezeki Ternakan Ruminan dan Unggas dengan peruntukan sebanyak RM30 juta bagi membantu penternak kecil menambahkan sumber pendapatan menerusi pakej bantuan bagi perolehan ternakan, makanan ternakan dan input peralatan ladang. Skim ini memberikan manfaat kepada sejumlah 374 orang penternak dengan nilai bantuan sebanyak RM5.06 juta pada tahun 2022;
- (iii) pelaksanaan Program Agropreneur Muda (PAM) bagi membantu dan menggalakkan penglibatan golongan muda dalam bidang penternakan menerusi Geran Agropreneur Muda dalam bentuk barangan bernilai RM20,000 setiap individu dan bantuan modal melalui Pakej Pembiayaan Khas Agrobank dan TEKUN Nasional sehingga RM500,000 bagi projek pengembangan. Pada tahun 2021, PAM telah memanfaatkan seramai 895 orang agropreneur muda seluruh negara dengan nilai kelulusan berjumlah RM34,619,802; dan
- (iv) Pelaksanaan Program Pemodenan Vesel dan Mekanisasi Tangkapan melalui dana sebanyak RM150 juta dalam bentuk pinjaman dengan kadar faedah 3.0% setahun selama 10 tahun. Kemudahan ini diperuntukkan oleh kerajaan untuk penghijrahan nelayan Zon A dan B dengan perolehan baru vesel moden berteknologi tinggi termasuk peralatan mekanisasi serta naiktaraf vesel moden yang lebih selesa untuk menarik minat pekerja tempatan.

Di samping itu, Kerajaan terus komited untuk meneruskan pemberian subsidi dan insentif tanaman khususnya padi yang bernilai sebanyak RM1.53 bilion setahun merangkumi program khusus seperti subsidi harga padi dan insentif tanaman padi yang memberikan manfaat kepada para pesawah termasuk pesawah padi bukit / huma di Sabah dan Sarawak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : PUAN VIVIAN WONG SHIR YEE
(SANDAKAN)**

TARIKH : 5 OKTOBER 2022 (RABU)

SOALAN

PUAN VIVIAN WONG SHIR YEE (SANDAKAN) minta **MENTERI PERTANIAN DAN INDUSTRI MAKANAN** menyatakan sama ada pihak Kementerian telah memasukkan perancangan bagi pembinaan kompleks dan jeti pendaratan ikan Lembaga Kemajuan Ikan Malaysia (LKIM) dengan kemudahan penyimpanan sejuk beku di Sandakan, di bawah RMK-12 bagi memudahkan lagi pembangunan industri makanan laut untuk pasaran tempatan dan eksport di Sandakan.

JAWAPAN

Tuan Yang di-Pertua,

Untuk makluman Ahli Yang Berhormat, Lembaga Kemajuan Ikan Malaysia (LKIM) dalam tindakan melaksanakan kajian-kajian yang diperlukan sebelum pembinaan kompleks dan jeti pendaratan ikan LKIM dengan kemudahan penyimpanan sejuk beku dilaksanakan. Ia bertujuan bagi menilai kebolehlaksanaan projek tersebut, termasuk penyediaan kemudahan-kemudahan yang diperlukan di sesebuah kompleks pendaratan. Antara kajian yang sedang dilaksanakan oleh LKIM adalah:

- a) *Social Impact Analysis* (SIA);
- b) *Environmental Impact Analysis* (EIA); dan
- c) Kajian Hidraulik

Hasil kajian tersebut akan digunakan sebagai garis panduan bagi permohonan pada *Rolling Plan* Keempat Rancangan Malaysia Kedua Belas (RP4, RMKe-12).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN PANG HOK LIONG [LABIS]
TARIKH : 05 OKTOBER 2022 (RABU)

SOALAN

TUAN PANG HOK LIONG [LABIS] minta **MENTERI KEWANGAN** menyatakan berapa jumlah faedah hutang negara telah dibayar oleh Kerajaan bagi tahun 2018, 2019, 2020, 2021 dan 2022.

JAWAPAN

Tuan Yang di-Pertua,

Kerajaan sentiasa menekankan aspek penting dalam pengurusan hutang iaitu kemampuan keberhutangan dan kemampunan hutang agar obligasi pembayaran hutang dapat dipenuhi dan hutang sentiasa berada di tahap terurus. Untuk makluman Tuan Yang di-Pertua, komitmen Kerajaan dalam pembayaran hutang Kerajaan Persekutuan terbahagi kepada bayaran hutang prinsipal yang matang dan faedah. Bayaran balik hutang prinsipal dilaksanakan secara pembiayaan semula (*refinancing*) manakala bayaran faedah dibiayai menerusi peruntukan di bawah item tanggungan T13. Item tanggungan T13 merupakan salah satu perbelanjaan tanggungan yang diberi keutamaan terlebih dahulu daripada item perbelanjaan yang lain, selaras dengan Perkara 98(1)(b) Perlembagaan Persekutuan iaitu segala caj hutang adalah di bawah tanggungan Kerajaan Persekutuan.

Untuk makluman, Kerajaan telah membayar faedah hutang Kerajaan Persekutuan di bawah item tanggungan T13 sebanyak RM30.5 bilion pada 2018, RM32.9 bilion pada 2019, RM34.5 bilion pada 2020 dan RM38.1 bilion pada 2021. Manakala, sebanyak RM43.1 bilion daripada

anggaran jumlah perbelanjaan Kerajaan Persekutuan 2022 telah diperuntukkan bagi tujuan pembayaran faedah ke atas hutang terkumpul Kerajaan Persekutuan.

Tuan Yang di-Pertua,

Sehingga kini, Kerajaan sentiasa komited dan tidak pernah gagal dalam memenuhi obligasi pembayaran balik hutang mengikut jadual yang ditetapkan. Oleh demikian, pelaksanaan langkah konsolidasi fiskal disertai kutipan hasil yang lebih baik pasca-krisis dijangka akan dapat mengurangkan paras hutang secara beransur-ansur demi memastikan kemampanan fiskal dalam jangka masa panjang serta membuktikan komitmen Kerajaan dalam aspek pengurusan hutang yang mampan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 05 OKTOBER 2022 (RABU)

SOALAN

PUAN HAJAH NATRAH BINTI ISMAIL [SEKIJANG] minta **MENTERI KANAN PENDIDIKAN** menyatakan tindakan drastik yang boleh diambil oleh Kementerian terhadap Dasar Pendidikan Negara agar sistem pendidikan di Malaysia tidak ketinggalan ke belakang berbanding dengan negara-negara maju yang lain.

JAWAPAN

Tuan Yang di-Pertua,

Kementerian Pendidikan Malaysia (KPM) terus komited memastikan sistem pendidikan negara berkualiti tinggi dan setanding standard antarabangsa. KPM mentransformasi sistem pendidikan berpandukan Pelan Pembangunan Pendidikan Malaysia (PPPM) 2013-2025, *Sustainable Development Goal 4* (SDG4) 2030 dan perubahan ekologi pendidikan dunia bagi memastikan pendidikan Malaysia setanding dengan negara maju.

Untuk makluman Ahli Yang Berhormat, dalam konteks daya saing di peringkat antarabangsa, Malaysia telah mencatatkan pencapaian murid yang memberangsangkan dalam *Trends in International Mathematics and Science Study* (TIMSS) 2019, yang dikendalikan oleh *International Association for the Evaluation of Educational Achievement* (IEA). Bagi tahun 2019, Malaysia memperoleh skor individu melebihi 700, yang merupakan skor Aras Tertinggi bagi kedua-dua mata pelajaran Matematik dan Sains.

Selain itu, pencapaian skor individu murid dalam mata pelajaran Sains adalah yang tertinggi sejak penyertaan Malaysia dalam TIMSS bermula tahun 1999.

Dalam hal ini, KPM sentiasa berusaha menambah baik kualiti sistem pendidikan negara dengan memberi penekanan kepada pembangunan karakter murid secara menyeluruh. KPM telah mengurangkan penekanan kepada peperiksaan dan pentaksiran secara berpusat dengan memberi fokus kepada Pentaksiran Berasaskan Sekolah (PBS). Berikutan pemansuhan Ujian Pencapaian Sekolah Rendah (UPSR) mulai tahun 2021 dan Pentaksiran Tingkatan Tiga (PT3) mulai tahun 2022, KPM memberi tumpuan kepada pemeraksanaan PBS, melibatkan komponen Pentaksiran Bilik Darjah (PBD), Pentaksiran Aktiviti Jasmani, Sukan dan Kokurikulum (PAJSK) serta Pentaksiran Psikometrik (PPSi).

Dalam konteks PBD, guru memantau perkembangan, kemajuan dan penguasaan setiap murid dalam proses pembelajaran mereka termasuk kemahiran asas membaca, menulis dan mengira (3M). Dengan ini, guru boleh merancang dan mengubah suai kaedah pengajaran dan pembelajaran (PdP) bagi membantu setiap murid meningkatkan tahap penguasaan pembelajaran mereka. Pelaksanaan PBD secara berterusan dapat mempersiapkan murid dengan pengetahuan, kemahiran dan nilai sebagai asas yang kukuh untuk mengikuti pembelajaran di peringkat seterusnya.

Kejayaan dan kemenjadian murid haruslah dilihat secara holistik dan bukan semata-mata berdasarkan prestasi dalam bidang akademik sahaja. Justeru, pentaksiran melalui PAJSK dan PPSi juga diperkukuh bagi menilai perkembangan murid dalam aspek sukan, kokurikulum, nilai murni, minat dan kecenderungan serta pembentukan sahsiah. Selain itu, KPM juga akan terus menambah baik dan memantapkan kaedah pelaporan PBD. Melalui kaedah ini, pencapaian murid dilaporkan secara menyeluruh dua kali setahun iaitu pada pertengahan sesi akademik dan akhir sesi akademik menggunakan deskriptor tahap penguasaan yang komprehensif dan jelas. Pelaporan ini juga menilai tahap usaha murid dalam pembelajaran. Di samping itu, guru kelas dan guru mata pelajaran akan memberi ulasan dan cadangan intervensi bagi mengoptimumkan potensi murid.

Selain daripada pelaporan PBD, laporan akhir sesi akademik akan turut disertakan dengan pelaporan PAJSK dan PPSi. Secara keseluruhan, penambahbaikan pelaporan PBS dapat memberi gambaran mengenai kemenjadian murid secara menyeluruh, komprehensif dan bermakna. Pemerkasaan PBS merupakan antara pendekatan KPM untuk beralih daripada pembelajaran berorientasi peperiksaan kepada pembelajaran yang lebih menyeronokkan dan berkesan untuk murid.

KPM juga memberi tumpuan dalam aspek pengukuhan kualiti latihan guru dengan menyediakan pembangunan profesionalisme berterusan kepada guru bagi memastikan guru sentiasa bersedia serta bermotivasi dalam menjalankan tugas dan berusaha meningkatkan kualiti perkhidmatan masing-masing. Guru juga sentiasa diberi latihan dan bimbingan bagi mendukung pelaksanaan dasar pendidikan, termasuk melengkapkan guru dengan kemahiran dalam aspek pendigitalan pendidikan bagi mendepani pendidikan abad ke-21. Di samping itu, KPM juga menyediakan latihan dalam meningkatkan kesejahteraan psikologi untuk memberikan kemahiran pengurusan emosi, kawalan diri dan amalan harian yang positif berdasarkan tahap kesejahteraan psikologi yang dinilai melalui Inventori Kesejahteraan Psikologi (IKPsi).

Untuk makluman Ahli Yang Berhormat, KPM juga sedang di peringkat akhir penyediaan dasar pendidikan digital. Tumpuan utama dasar ini adalah untuk melahirkan generasi fasih digital dan berdaya saing. Dasar dirangka bagi memupuk bakat digital yang berpengetahuan, berkemahiran dan beretika dalam penggunaan teknologi digital.

Di bawah kerangka dasar ini, antara tumpuan yang diberikan adalah meningkatkan penguasaan murid dalam teknologi digital, memperkayakan kandungan digital yang berkualiti dan memperkasakan kompetensi guru serta mengupayakan infostruktur dan infrastruktur digital institusi di bawah KPM.

KPM yakin usaha berterusan ini mampu meningkatkan kualiti dan tahap pendidikan negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN LOKE SIEW FOOK [SEREMBAN]

TARIKH : 5 OKTOBER 2022 (RABU)

SOALAN

TUAN LOKE SIEW FOOK [SEREMBAN] minta **MENTERI ALAM
SEKITAR DAN AIR** menyatakan perancangan dan garis masa Kerajaan
untuk menggubal Akta Pencemaran Jerebu Rentas Sempadan (THPA)
dan Akta Perubahan Iklim serta meminda Akta Kualiti Alam Sekeliling
1974 (AKAS 1974) bagi menangani isu perubahan iklim.

JAWAPAN

Tuan Yang Di-Pertua,

1. Untuk makluman Ahli Yang Berhormat, penggubalan akta memerlukan salah satu kaedah bagi memastikan isu alam sekitar termasuk perubahan iklim dapat ditangani dengan lebih berkesan. Walau bagaimanapun, keperluan penggubalan akta tersebut serta keberkesanan akta yang digubal juga perlu diteliti dan diperhalusi bagi memastikan ia dapat mencapai objektif penggubalan akta tersebut.
2. Sehubungan itu, Kerajaan memutuskan untuk tidak meneruskan cadangan untuk mewujudkan Akta Pencemaran Jerebu Rentas Sempadan. Pelbagai pendekatan baru boleh dilaksanakan bagi menangani isu ini termasuk mengadakan perbincangan dan kerjasama dengan negara-negara jiran melalui platform kerjasama sedia ada.
3. Bagi penggubalan Rang Undang-Undang Perubahan Iklim pula, fasa pertama iaitu penyediaan kerangka undang-undang telah siap pada Disember 2021. Kementerian sedang mengambil tindakan untuk melaksanakan fasa penggubalan Rang Undang-Undang Perubahan Iklim dijangka akan mengambil masa selama tiga (3) tahun.
4. KASA juga sedang dalam proses untuk meminda Akta Kualiti Alam Sekeliling 1974 (Akta 127). Pindaan ini terbahagi kepada dua iaitu Fasa Pertama yang melibatkan hukuman, denda dan penalti. Manakala pindaan-pindaan bersifat substantif akan dilaksanakan dalam Fasa kedua. Pindaan Akta 127 Fasa Pertama telah dibentangkan untuk bacaan pertama di Dewan Rakyat pada 3 Oktober 2022.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN HASANUDDIN BIN MOHD YUNUS
[HULU LANGAT]**

TARIKH : 5 OKTOBER 2022 (RABU)

SOALAN

**TUAN HASANUDDIN BIN MOHD YUNUS [HULU LANGAT] minta
MENTERI PENGAJIAN TINGGI** menyatakan apakah ada pemantauan
sejauh mana aktiviti kelab-kelab politik di luar negara menjejaskan
prestasi akademik pelajar-pelajar Malaysia di seberang laut.

JAWAPAN

Tan Sri Yang di-Pertua,

Kementerian Pengajian Tinggi (KPT) melalui pejabat Education Malaysia Luar Negara (EMLN) sentiasa memantau aktiviti kelab pelajar di luar negara.

Sehingga kini terdapat 292 persatuan atau kelab pelajar yang tidak berteraskan parti politik dan berdaftar dengan pejabat Education Malaysia Luar Negara. Aktiviti persatuan atau kelab ini adalah tertumpu kepada pembangunan sahsiah, riadah dan kebajikan pelajar. Manakala, terdapat juga beberapa persatuan atau kelab yang berkaitan parti politik. Aktiviti yang dilaksanakan oleh persatuan atau kelab ini bagaimanapun tidak bertentangan dengan peraturan berpersatuan di negara ia didaftarkan.

KPT melalui pejabat EMLN sentiasa membuat pemantauan bagi memastikan aktiviti yang dianjurkan oleh persatuan atau kelab pelajar di luar negara berada dalam landasan yang betul dan tidak bertentangan dengan aspirasi negara.

Pada hemat Kementerian, penglibatan pelajar dalam aktiviti persatuan yang diiktiraf merupakan nilai tambah kepada potensi diri mereka, khususnya dalam aspek kepimpinan, pengkayaan pengetahuan dan juga pembangunan sahsiah diri pelajar.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN NGA KOR MING [TELUK INTAN]

TARIKH : 05 OKTOBER 2022 (RABU)

SOALAN

TUAN NGA KOR MING [TELUK INTAN] minta **MENTERI KANAN PENDIDIKAN** nyatakan secara terperinci jumlah bilangan sekolah-sekolah daif mengikut negeri dan aliran sekolah serta berapakah peruntukan akan diberi untuk menyelamatkan sekolah-sekolah daif ini demi kebajikan murid dan guru sekolah.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam memastikan fasiliti bangunan dan kemudahan sekolah dalam keadaan baik agar menjamin keselamatan dan keselesaan warga sekolah.

Untuk makluman Ahli Yang Berhormat, KPM telah mengenal pasti sebanyak 781 buah sekolah yang mempunyai bangunan daif di seluruh negara. Sebahagian besar sekolah yang mempunyai bangunan daif adalah terdiri daripada sekolah kerajaan (SK) iaitu sebanyak 770 buah manakala, sekolah bantuan (SBK) adalah 11 buah. Sehingga 1 September 2022, bilangan sekolah yang mempunyai bangunan daif mengikut negeri adalah seperti berikut:

- i. Kedah: 37 buah sekolah
- ii. Pulau Pinang: 7 buah sekolah
- iii. Perak: 42 buah sekolah

- iv. Selangor: 5 buah sekolah
- v. Negeri Sembilan: 17 buah sekolah
- vi. Melaka: 3 buah sekolah
- vii. Johor: 10 buah sekolah
- viii. Kelantan: 13 buah sekolah
- ix. Terengganu: 9 buah sekolah
- x. Pahang: 5 buah sekolah
- xi. Sabah: 277 buah sekolah
- xii. Sarawak: 356 buah sekolah
- xiii. Wilayah Persekutuan Labuan: 1 buah sekolah

Untuk makluman Ahli Yang Berhormat, secara keseluruhannya, dari tahun 2016 sehingga tahun 2022, KPM telah diluluskan peruntukan sejumlah RM5.003 billion bagi melaksanakan 921 projek menaik taraf dan membangunkan semula bangunan daif di sekolah seluruh Malaysia. Status terkini pelaksanaan projek adalah 637 projek telah siap sepenuhnya, 101 projek dalam peringkat pembinaan dan 183 projek di peringkat pra bina.

Daripada jumlah peruntukan tersebut, sebanyak RM706.73 juta telah diperuntukan bagi melaksanakan 278 buah projek menaik taraf dan membangunkan semula bangunan daif di sekolah-sekolah di Semenanjung Malaysia. Manakala di negeri Sabah, sebanyak RM1.924 bilion telah diluluskan bagi melaksanakan 282 projek menaik taraf dan membangunkan semula bangunan daif di sekolah di negeri tersebut. Bagi negeri Sarawak pula, sebanyak 361 projek menaik taraf dan membangunkan semula bangunan daif di sekolah telah diluluskan dengan kos keseluruhan sebanyak RM2.373 bilion.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN JUGAH MUYANG [LUBOK ANTU]

TARIKH : 05 OKTOBER 2022 (RABU)

SOALAN

TUAN JUGAH MUYANG [LUBOK ANTU] minta **MENTERI KANAN PENDIDIKAN** menyatakan bagi memartabatkan profesion keguruan, apakah ada insentif khas bagi para guru DG41/DG42 yang telah melanjutkan pelajaran ke peringkat MA dan PhD semasa perkhidmatannya.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam memastikan pembangunan modal insan guru diberikan keutamaan termasuk galakan untuk melanjutkan pelajaran ke peringkat yang lebih tinggi. Dalam hal ini, KPM menawarkan Hadiah Latihan Persekutuan kepada guru yang layak untuk melanjutkan pelajaran ke peringkat ijazah sarjana dan ijazah kedoktoran dalam tempoh perkhidmatan.

Untuk makluman Ahli Yang Berhormat, guru yang berjaya menamatkan pelajaran di peringkat ijazah sarjana dan ijazah kedoktoran diberikan kelebihan merit yang lebih tinggi dalam kriteria tahap akademik bagi pertimbangan kenaikan pangkat. Selain itu, guru tersebut turut diberikan kelebihan merit yang lebih tinggi dalam Program Penilaian Kepimpinan Pendidikan bagi Pegawai Perkhidmatan Pendidikan KPM (*Profiling*).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN AHMAD FAHMI BIN MOHAMED
FADZIL [LEMBAH PANTAI]
TARIKH : 05 OKTOBER 2022 (RABU)

SOALAN

TUAN AHMAD FAHMI BIN MOHAMED FADZIL [LEMBAH PANTAI] minta **MENTERI KEWANGAN** menyatakan langkah-langkah segera yang akan diambil Kerajaan secara bersepadu bagi mengekang dan melumpuhkan aktiviti jenayah *scammer* melibatkan perbankan dalam talian (*online banking*).

JAWAPAN

Tuan Yang di-Pertua,

Isu jenayah siber atau penipuan dalam talian (*online banking*) bukan sahaja berlaku di Malaysia, malah di peringkat global. Kerajaan memandang serius akan perkara ini dan telah mengambil langkah-langkah yang berterusan untuk menangani isu ini.

Dalam usaha membanteras jenayah penipuan kewangan dengan lebih berkesan, Kerajaan melalui agensi-agensi terlibat seperti Polis Diraja Malaysia (PDRM), Bank Negara Malaysia (BNM), Suruhanjaya Pencegahan Rasuah Malaysia (SPRM), Suruhanjaya Komunikasi dan Multimedia Malaysia (SKMM), Kementerian Perdagangan Dalam Negeri dan Hal Ehwal Pengguna (KPDNHEP), Suruhanjaya Syarikat Malaysia (SSM) dan Suruhanjaya Sekuriti Malaysia (SC) telah bekerjasama dalam melaksanakan pelbagai inisiatif termasuklah kegiatan pemantauan, pencegahan, siasatan dan pendakwaan di mahkamah. Kerjasama ini antara lain bertujuan untuk membantu tindakan penguatkuasaan melalui

perkongsian maklumat antara agensi bagi memastikan siasatan dapat dilaksanakan dengan lancar dan berkesan.

Selain itu, satu inisiatif baharu akan dilaksanakan di antara pihak BNM bersama-sama dengan PDRM, SKMM dan Pusat Pencegahan Jenayah Kewangan Nasional (di bawah Jabatan Perdana Menteri) untuk mempertingkatkan *Commercial Crime Investigation Department (CCID) Scam Response Centre* bagi mewujudkan platform perkongsian maklumat yang lebih sistematik dan memastikan tindakan segera dapat diambil bagi menghalang kerugian kewangan selanjutnya berlaku. Agensi-agensi yang terlibat akan bekerjasama dari segi perkongsian sumber, kepakaran dan data serta mengambil langkah-langkah pencegahan bersama yang lebih komprehensif.

Pihak Kementerian Kewangan melalui BNM juga akan bekerjasama dengan pihak SKMM dan syarikat-syarikat telekomunikasi untuk mempertingkatkan keselamatan saluran komunikasi dan multimedia bagi menyekat terbitan mesej palsu dan penyebaran perisian hasad (*malware*) oleh sindiket penipuan kewangan, di samping menyenarai hitamkan nombor telefon dan peranti mudah alih yang terlibat dalam kes penipuan kewangan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : PUAN ALICE LAU KIONG YIENG
[LANANG]
TARIKH : 05 OKTOBER 2022 (RABU)

SOALAN

PUAN ALICE LAU KIONG YIENG [LANANG] minta **MENTERI KEWANGAN** menyatakan jumlah bantuan subsidi yang masih diberikan oleh Kerajaan kepada rakyat untuk meringankan beban dan senaraikan jumlah subsidi bagi setiap bahan yang diberikan subsidi pada 2018 - 2022 serta senaraikan bahan yang telah dihentikan bantuan subsidi pada tahun 2022.

JAWAPAN

Tuan Yang di-Pertua,

Berdasarkan prestasi perbelanjaan sebenar bagi subsidi keperluan asas yang dibiayai oleh Kerajaan untuk meringankan kos sara hidup rakyat seperti Subsidi Program Skim Penstabilan Minyak Masak, Subsidi Program Tepung Gandum Am, Subsidi Gas Cecair, *Liquefied Petroleum Gas* (LPG), Diesel dan Petrol, dan lain-lain termasuk Bantuan Keluarga Malaysia adalah sejumlah RM30.5 bilion bagi tahun 2018, RM26.5 bilion bagi tahun 2019, RM23.3 bilion bagi tahun 2020, RM37.3 bilion bagi tahun 2021.

Untuk tahun 2022, bantuan dan subsidi diunjurkan mencecah RM77.7 bilion berbanding dengan peruntukan yang diluluskan di bawah Bajet 2022 sebanyak RM31 bilion. Peningkatan keperluan subsidi berbangkit ekoran langkah Kerajaan untuk bukan sahaja meneruskan subsidi tetapi meningkatkan perbelanjaan subsidi terutamanya berkaitan petrol, diesel, *Liquefied Petroleum Gas* (LPG) dan minyak masak. Di samping itu, Kerajaan juga memperkenalkan **subsidi baharu yang tidak**

disediakan di dalam Bajet 2022, khususnya subsidi elektrik serta subsidi ayam dan telur.

Kerajaan juga sedang mengkaji mekanisme pemberian subsidi petrol, diesel, LPG supaya dapat dilaksanakan dengan lebih bersasar dan menumpukan bantuan dan subsidi kepada golongan rentan dan mereka yang benar-benar memerlukan bantuan. Pelaksanaan subsidi secara bersasar dijangka dapat mengoptimumkan sumber kewangan Kerajaan dan penjimatan yang dicapai dapat diagihkan semula untuk program yang lebih berkesan menyumbang kepada kesejahteraan rakyat.

Kerajaan akan terus meneliti dan menambahbaik subsidi yang disediakan ke arah :

- pertama, subsidi dan bantuan yang lebih bersasar iaitu ditumpukan kepada golongan yang memerlukan,
- kedua, mengurangkan ketirisan subsidi dan herotan pasaran, dan
- ketiga, mengelakkan kenaikan harga yang mendadak.

Sekian, terima kasih

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KEEMPAT BELAS 2022**

**PERTANYAAN : LISAN
DARIPADA : TUAN LIM GUAN ENG [BAGAN]
TARIKH : 05 OKTOBER 2022 (RABU)**

SOALAN

TUAN LIM GUAN ENG [BAGAN] minta **MENTERI KEWANGAN** menyatakan sama ada kerajaan bercadang untuk membubarkan Majlis Pemulihan Negara memandangkan peranannya tidak membuahkan hasil apabila cadangan pengurusan ekonomi badan tersebut tidak diterima pakai oleh pihak Kerajaan, khususnya langkah mengurangkan inflasi dan inflasi makanan.

JAWAPAN

Tuan Yang di-Pertua,

Seperti mana Ahli Yang Berhormat sedia maklum, MPN telah ditubuhkan pada 21 Julai 2021 oleh Mesyuarat Jemaah Menteri melalui Memorandum Jemaah Menteri daripada Kementerian Kewangan. Sepanjang tahun 2022, MPN telah bermesyuarat sebanyak sembilan (9) kali dan telah mencadangkan pelbagai cadangan dan inisiatif utama antaranya:

- isu melibatkan kekurangan pekerja asing daripada pelbagai sektor terutamanya perladangan yang dilaporkan mengalami kerugian hampir RM20 bilion pada tahun 2021;
- isu melibatkan bantuan kepada PMKS dalam menyelesaikan masalah (*liquidity*) kecairan aliran tunai PMKS yang masih terjejas walaupun berada di fasa peralihan ke endemik;

- isu melibatkan keciciran pembelajaran akibat daripada penutupan institusi pendidikan semasa tempoh pandemik COVID-19;
- isu pemeraksanaan sekuriti dan bekalan makanan; dan
- potensi produktiviti industri pelancongan yang masih di tahap minimum dan tidak mencerminkan prestasi pemulihan yang positif.

Untuk maklum Ahli Yang Berhormat juga, kejayaan pelaksanaan Pelan Pemulihan Negara 1.0 (PPN 1.0) yang telah dilancarkan pada Julai 2021 adalah antara cadangan MPN yang telah diterima baik pelaksanaannya oleh Kerajaan.

Untuk makluman Ahli Yang Berhormat juga, selain daripada wakil pihak Kerajaan, MPN turut dianggotai oleh pakar-pakar ekonomi, sosial dan pendidikan termasuk wakil daripada parti-parti pembangkang.

Walau bagaimanapun, Ahli Yang Berhormat perlu sedia maklum bahawa MPN tidak mempunyai kuasa eksekutif dan hanya bertindak sebagai badan penasihat kepada Kerajaan semata-mata. Ini bermakna, kuasa bagi membubarkan MPN adalah tertakluk kepada Jemaah Menteri dan pihak Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' DR. XAVIER JAYAKUMAR A/L
ARULANANDRAM [KUALA LANGAT]**

TARIKH : 5 OKTOBER 2022 (RABU)

SOALAN

DATO' DR. XAVIER JAYAKUMAR A/L ARULANANDRAM [KUALA LANGAT] minta **MENTERI ALAM SEKITAR DAN AIR** menyatakan sama ada Kementerian bercadang untuk mengenakan cukai karbon terhadap sektor penjanaan elektrik dan sektor kilang. Jika tidak, mengapa.

JAWAPAN

Tuan Yang Di-Pertua,

1. Untuk makluman Ahli Yang Berhormat, cukai karbon merupakan salah satu instrumen ekonomi yang digunakan bagi mengekang aktiviti pelepasan gas rumah kaca daripada sektor yang telah dikenalpasti antaranya, sektor tenaga dan industri. Walaupun ianya berpotensi mengekang aktiviti pelepasan gas rumah kaca, kerajaan buat masa ini belum merancang untuk melaksanakan cukai karbon kepada mana-mana sektor.
2. Kerajaan berpandangan keberkesanan instrumen ini harus diteliti dan diperhalusi agar sektor-sektor utama yang memacu ekonomi negara ini tidak terkesan di samping memastikan pelaksanaannya tidak membebankan pihak industri dan pengguna.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : PUAN WONG SHU QI (KLUANG)

TARIKH : 5 OKTOBER 2022 (RABU)

SOALAN

PUAN WONG SHU QI (KLUANG) minta **MENTERI PERTANIAN DAN INDUSTRI MAKANAN** menyatakan secara terperinci kesemua 96 inisiatif yang disenaraikan dalam Pelan Tindakan Dasar Sekuriti Makanan 2021 - 2025 serta kos yang diperuntukkan untuk pelaksanaan setiap inisiatif.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) telah merangka Pelan Tindakan Dasar Sekuriti Makanan Negara 2021-2025 (Pelan Tindakan DSMN) bagi meningkatkan daya tahan sistem makanan agar kekal utuh dalam menghadapi sebarang tekanan. Keseluruhan 96 inisiatif di bawah Pelan Tindakan DSMN ini boleh dikategorikan berdasarkan kluster sekuriti makanan iaitu Ketersediaan, Kebolehcapaian, Keselamatan Makanan dan Pemakanan serta Kestabilan dan Kemampunan seperti di bawah:

- 1) Sebanyak 20 inisiatif di bawah Kluster Ketersediaan yang fokus bagi menjamin bekalan makanan yang ditentukan oleh pengeluaran tempatan, stok penimbal dan juga perdagangan. Antara inisiatif

adalah pemodenan vesel bagi meningkatkan produktiviti tangkapan nelayan zon A dan B;

- 2) Sebanyak 26 inisiatif di bawah Kluster Kebolehcapaian yang merujuk kepada kemampuan penduduk untuk mendapatkan makanan secara ekonomi dan fizikal. Antara inisiatif adalah galakan kepada peniaga untuk menggunakan teknologi terkini seperti rantai blok (*block chain*);
- 3) Sebanyak 17 inisiatif pula terkandung dalam Kluster Keselamatan Makanan dan Pemakanan dalam memastikan keselamatan makanan terjamin dan penduduk mengambil makanan yang sihat dan mencukupi. Inisiatif di bawah kluster ini adalah seperti memperkasakan tahap keselamatan makanan produk *home-based* serta inisiatif *MyMeal* kepada pengeluar untuk menyediakan makanan sihat; dan
- 4) Sebanyak 33 inisiatif telah disenaraikan di bawah Kluster Kestabilan dan Kemampanan supaya sistem makanan terus kekal rentan akibat faktor seperti perubahan iklim, pandemik, mahupun bencana alam. Antaranya, pembangunan kaedah mitigasi dan adaptasi perubahan iklim bagi buah-buahan dan tanaman terpilih.

Untuk makluman Ahli Yang Berhormat jua, kebanyakan inisiatif yang terkandung dalam pelan tindakan ini merupakan program atau aktiviti semasa Kementerian dan agensi mengguna pakai peruntukan sedia ada. Namun, terdapat juga insiatif yang dalam perancangan dan telah dipohon peruntukannya serta dalam pertimbangan lanjut pihak Kerajaan.

Sekian, terima kasih.